



TZITADI DE QUARTU SANT'ALENI

Statutu Comunali

APROVAU cun deliberatzioni de su Cunsillu Comunali n. 12 de su 08 friàrgiu 2001.

ESAMINAU de su Cumitau Regionali de Scrucullu in setziada de su 28 de martzu 2001 finsas a su n.000598.

PUBLICAU in s'Albu Pretòriu po 30 diis de su 26/04/2001 a su 25/05/2001.

IMBIAU a su Bulletinu Ufizziali de sa Regioni Autònoma de Sardìnnia su 7/04/2001.

PUBLICAU in su Bulletinu Ufizziali de sa Regioni Autònoma de Sardìnnia n. 20 de su 12/06/2001 – sa de tres parti.

INTRAU in vigèntzia su 26/05/2001.

MUDAU cun deliberatzioni de su Cumissàriu n. 40 de su 7 de martzu 2005.

PUBLICAU in su Bullettinu Ufizziali de sa Regioni Autònoma de Sardìnnia n. 12 de su 18.04.2005 – sa de tres parti.

MODAU cun deliberatzioni de su Cunsillu Comunali n. 108 de su 07.12.2010.

PUBLICAU in s'Albu Pretòriu po 30 diis de su 10.12.2010 finsas a su 10.01.2011.

PUBLICAU in su Bulletinu Ufizziali de sa Regioni Autònoma de Sardìnnia n. 04 de su 08.02.2011 - sa de tres parti.

Sumàriu

PRIMU TÌTULU: ALLEGAS GENERALIS E ORDINAMENTU.....	7
Art. 1 Sa Comunità.....	7
Art.2 Sa autonomia.....	7
Art. 3 Su Statutu.....	7
Art. 4 S'arrolu de su Comunu.....	8
Art. 5 Is funtzionis comunali.....	9
Art. 6 S'atividadì amministrativa.....	9
Art. 7 Caraterísticas costitutivas.....	9
Art. 9 Programatzioni e pianificatzioni.....	10
Art. 10 Partecipatzioni a sa atividadi políticu-amministrativa.....	10
Art. 11 Amparu de sa saludi e de sa seguresa sotziali.....	11
Art. 12 Amparu de s'azienda naturali, stòriga e artìstica.....	11
Art. 13 Promovidura de sa cultura, sport e tempus lìberu.....	11
Art. 14 Produssidura, agricultura, artesanau e turismu.....	12
Art. 15 Assètiu, amparu e impreu de su territòriu.....	12
Art. 16 Tragus, circolatzioni.....	12
Art. 17 Is servìtzios pùblicos e is maneras de gestioni.....	12
Art. 18 Rapresentàntzia de sa comunità.....	13
Art. 19 Adelantamentu sotziali, culturali e econòmicu.....	13
Art. 20 Princìpiu de is stremus profetosus po sa cumpridura de sa paridadi mascu-fèmina: Cumissioni Pari Oportunidades.....	13
Art. 21 Traballu, formatzioni e políticas de sa paridadi.....	13
Art. 22 Chistidura de is àutus, de is documentus e sa connoscèntzia insoru.....	13
Art. 23. Impreu de sa Lìngua sarda.....	14
SU DE DUUS TÌTULU: IS ÒRGANUS COMUNALIS.....	16
PRIMU CÀBUDU: ORDINAMENTU.....	16
Art. 24 Arrègulas generalis.....	16
SU DE DUUS CÀBUDU: SU SÌNDIGU.....	16
Art. 25 Arrolu e funtzionis.....	16
Art. 26 Cumpetèntzias.....	17
Art. 27 Vigilàntzia.....	17
Art. 28 Atributzionis po is servìtzios statalis.....	18
Art. 29 Poderius de ordinàntzia.....	18
Art. 30 Rapresentàntzia e coordinamentu.....	18

Art. 31 Decadèntzia de sa càrriga de Sìndigu.....	19
Art. 32 Su Vicesìndigu.....	19
SU DE TRES CÀBUDU: SU CUNSILLU COMUNALI.....	19
Art. 33 Arrolu de su Cunsillu.....	19
Art. 34 Funtzionis de indiritzu políticu-aministrativu.....	20
Art. 35 Funtzionis de càstiu políticu-aministrativu e de gestioni.....	21
Art. 36 Cumpetèntzias de su Cunsillu.....	21
Art. 37 Nòminas de is rapresentantis.....	22
Art. 38 Maneras de impreu de is funtzionis de indiritzu e de scrucullu. .	23
Art. 39 Mandus e impèrius de is Cunsilleris Comunalis.....	24
Art. 40 Indennidadi.....	25
Art. 41 Arremprasamentu e suplidura de is Cunsilleris Comunalis e Circoscritzionalis.....	25
Art. 42 Funtzionis organizadoras.....	25
Art. 43 Is Trumas cunsillaris e sa Cunferèntzia de is Capigruppo.....	26
Art. 44 Dèpiris de is Cunsilleris.....	26
Art. 45 Dimitidura de sa càrriga de Cunsilleri Comunalis.....	27
46 Arrègulas generalis apitzus de sa operatividadi e apitzus de s'arrolu funtzionali de su Cunsillu Comunalis.....	27
Art. 47 Primu acorru de su Cunsillu Comunalis.....	27
Art. 48 Cunsilleri Bèciu.....	27
Art. 49 Iniziativa de is propònidas.....	28
Art. 50 Arrègulas generalis de funtzionamentu.....	28
SU DE CUÀTURU CÀBUDU: SU PRESIDENTI DE SU CUNSILLU COMUNALI.	28
Art. 51 Eligidura de su Presidenti e Vice Presidenti de su Cunsillu Comunalis.....	29
Art. 52 Tareas de su Presidenti de su Cunsillu Comunalis.....	29
SU DE CINCU CÀBUDU : IS ARTICOLATZIONIS DE SU CUNSILLU COMUNALI	30
Art. 53 Is Cumissionis cunsillaris.....	30
Art. 54 Cumissionis cunsillaris permanentis.....	30
Art. 55 Cumposidura e tareas de is Cumissionis cunsillaris permanentis	31
Art. 56 Sa Cunferèntzia de is Capigruppo.....	31
Art. 57 Is Cumissionis comunalis previdias de sa lei o de su Regulamentu	32
Art. 58 Is Cumissionis spetzialis.....	32
Art. 59 Struturas de apoderamentu a su Cunsillu e a is Cumissionis.....	33
SU DE SES CÀBUDU: SA GIUNTA COMUNALI.....	33
Art. 60 Cumposidura de sa Giunta.....	33

Art. 61 Arrolu e cumpetèntzas generalis.....	33
Art. 62 Esercìtziu de is tareas.....	34
Art. 63 Organizatzioni.....	34
Art. 64 Inelegibìlidadì e incumpatibìlidadì a sa càrriga de Sìndigu e Assessori.....	35
Art. 65 Tempus in càrriga e acabu.....	35
Art. 66 Motzioni de scunfiantza.....	35
Art. 67 Dimitiduras, acabu e bogadura de is Assessoris.....	36
Art. 68 Decadèssida de sa càrriga de Assessori.....	36
Art. 69 Arrègulas generalis de funtzionamentu.....	36
SU DE SETI CÀBUDU: DELIBERATZIONIS, ISTRUTÒRIA, PARRIS, DEPÒSITU ÀUTUS.....	36
Art. 70 Deliberatzionis, parri orgànicus collegialis.....	36
Art. 71 Procedimentu giustu.....	37
Art. 72 Istrutòria, documentatzioni, depòsitu e verbalizatzioni de is propònnidas.....	37
SU DE TRES TÌTULU: ISTITUTUS DE PARTECIPATZIONI POPOLARI.....	39
PRIMU CÀBUDU: SA PARTECIPATZIONI DE IS TZITADINUS A S'AMINISTRATZIONI COMUNALI.....	39
Art. 73 Sa partecipatzioni de is tzitadinus a s'aministratzioni.....	39
Art. 74 Cunsillu Comunali de is picocus.....	39
Art. 75 Sa partecipatzioni de is liberas formas assotziadoras.....	39
Art. 76 Sa atividadi de partecipatzioni de is Consultas.....	39
Art. 77 Relata apitzu de su stadu de sa Comunità.....	40
Art. 78 Sa partecipatzioni de is tzitadinus a solus.....	40
SEGUNDU CÀBUDU: SA CONSULTATZIONI DE IS TZITADINUS E IS REFERENDUM.....	40
Art. 79 Sa consultatzioni de is tzitadinus.....	40
Art. 80 Referendum consultivu.....	40
Art. 81 Referendum proponnidorì e consultivu.....	41
SU DE TRES CÀBUDU: SA CONSULTATZIONI DE IS TZITADINUS A SU PROCEDIMENTU AMINISTRATIVU.....	42
Art. 82 Sa partecipatzioni de is tzitadinus e procedimentu aministrativu	
Art. 83 Responsabilità de su procedimentu.....	42
Art. 83 Responsabilità de su procedimentu.....	42
SU DE CUÀTURU CÀBUDU: S'ATZIONI POPOLARI.....	42
Art. 84 S'atzioni arremprasadora.....	42
SU DE CINQU CÀBUDU: SU DERETU DE INTRADA E DE INFORMATZIONI DE SU TZITADINU.....	42

Art. 85 Publitzidadi de is àutus e de is informatzionis e deretu de intrada	42
SU DE SES CÀBUDU: S'AMPARADORI TZÌVICU.....	43
Art. 86 Istitutzioni, arrolu e relatas cun su Cunsillu Comunali.....	43
Art. 87 Recuisitus.....	43
Art. 88 Eletzionis e annuddamentu.....	44
Art. 89 Prerogativas e tareas.....	44
SU DE CUÀTURU TÌTULU: CIRCOSCRITZIONIS DE DETZENTRAMENTU COMUNALI.....	47
Art. 90 Articolatzioni territoriali.....	47
Art. 91 Òrganus de sa Circoscritzioni.....	47
Art. 92 Cumposidura e funtzionamentu de is Cunsillus Circoscritzionalis	48
Art. 93 Tareas cosa sua.....	48
Art. 94 Tareas delegadas.....	48
Art. 95 Organizatzioni de is atividades.....	48
Art. 96 Deliberatzioni de is Cunsillus de Circoscritzioni.....	49
Art. 97 Sciusciadura de su Cunsillu de Circoscritzioni.....	49
SU DE CINCU TÌTULU: ORDINAMENTU DE IS UFÌTZIUS E DE SU PERSONALI	51
PRIMU CÀBUDU: ORGANIZATZIONI DE IS UFÌTZIUS E DE SU TRABALLU..	51
Art. 98 Organizatzioni de is ufitzius e de is servìtzius.....	51
SEGUNDU CÀBUDU: SU SEGRETÀRIU GENERALI E DIRETORI GENERALI..	52
Art. 99 Arrolu e tareas.....	52
Art.100 Su Vice segretàriu Generali.....	52
Art.101 Su Diretori Generali.....	53
SU DE TRES CÀBUDU: IS DIRIGENTIS.....	53
Art.102 Tareas.....	53
Art.103 Direzioni de s'organizatzioni.....	55
Art.104 Cunferèntzia de is dirigentis e cunferèntzia de programa.....	56
Art.105 Atributzioni de sa tarea de direzioni, de coordinamentu e de programatzioni.....	56
SU DE SES TÌTULU: SERVÌTZIUS PÙBLICUS COMUNALIS.....	58
PRIMU CÀBUDU: CUMPETÈNTZIAS DE IS COMUNUS.....	58
Art.106 Servìtzius Comunalis.....	58
Art.107 Maneras de gestioni.....	58
Art.108 Nòmina de is aministradoris.....	59

SU DE DUUS CÀBUDU: GESTIONI DE IS SERVÌTZIUS PÙBLICUS LOCALIS	59
Art.109 Gestioni de is servìtzius.....	59
Art.110 Sa entrega a atrus de is servìtzius.....	60
Art.111 Is aziendas spetzialis.....	60
Art.112 Relatas cun su Comunu.....	61
Art.113 Is istituzionis.....	61
Art.114 Is sotziedadis po atzionis.....	62
SU DE SETI TÌTULU: GENIAS ASSOTZIADORAS E DE COOPERATZIONI INTRE IS ENTIS.....	64
PRIMU CÀBUDU: CUNVENTZIÒNIS E CUNSÒRTZIUS.....	64
Art.115 Cunventzionis.....	64
Art.116 Cunsòrtzius.....	64
SEGUNDU CÀBUDU: ACÒRDIUS DE PROGRAMA.....	65
Art.117 Obras de cumpetèntzia primària de su Comunu.....	65
SU DE OTU TÌTULU: GESTIONI ECONÒMICU-FINANTZIÀRIA E CONTABILIDADI	68
PRIMU CÀBUDU: SA PROGRAMATZIONI FINANTZIÀRIA.....	68
Art.118 Sa programatzioni de balanzu.....	68
Art.119 Gestioni Finantziària.....	68
Art.120 Ordinamentu contàbili de su Comunu.....	69
Art.121 Su programa de is obras pùblicas e de is imbistimentus.....	69
SEGUNDU CÀBUDU: SA AUTONOMIA FINANTZIÀRIA.....	70
Art.122 Is risorsas po sa gestioni currenti.....	70
Art.123 Is risorsas po is imbistimentus.....	70
SU DE TRES CÀBUDU: SA CHISTIDURA E GESTIONI DE S'ASIENDA.....	71
Art.124 Sa gestioni de s'azienda.....	71
SU DE CUÀTURU CÀBUDU: SA REVISIONI ECONÒMICU-FINANTZIÀRIA....	71
Art.125 Su Cullègiu de si Revisoris de is contus.....	71
SU DE CINCU CÀBUDU: ARRENDUS E CUNTRATUS.....	73
Art.126 Protzeduras negotzialis.....	73
SU DE SES CÀBUDU: SCRUCULLUS INTERNUS.....	73
Art.127 Tareas de su scrucullu.....	73
Art.128 Arresultaus de sa gestioni econòmicu-finantziària.....	73
Art.129 Nùcleu de valutatzioni e scrucullu stratègicu.....	74
Art.130 Nùcleu po su scrucullu de gestioni e sa valutatzioni de is Dirigentis.....	74
Art.131 Scrucullu de regularidadi amministrativa e contàbili.....	75
Art.132 Dotatzioni orgànica de is nùcleus e indennidadi.....	75

Art.133 Sistemias informativus po is scrucullus.....	75
SU DE SETI CÀBUDU: TESORERIA E CUNCESSIONÀRIU DE SU CUBERAMENTU.....	75
Art.134 Tesoreria e cuberamentu de is intradas.....	75
SU DE NOI TÌTULU: CULLABORATZIONI E RELATAS CUN ATRUS ENTIS.....	78
Art.135 Su Stadu.....	78
Art.136 Sa Regioni.....	78
Art.137 Sa Provìntzia.....	78
Art.138 Sa Comunitàdi Montana.....	79
SU DE DEXI TÌTULU: NORMAS TRANSIDORAS E FINALIS.....	81
Art.139 Revisioni de su Statutu.....	81
Art.140 Arricidura de is regulamentus.....	81
Art.141 Disciplina transidora.....	81
Art.142 Intrada in vigori.....	81

PRIMU TÌTULU

PRINTZÌPIUS GENERALIS E ORDINAMENTU

PRIMU TÌTULU: ALLEGAS GENERALIS E ORDINAMENTU

Art. 1 Sa Comunità

1. Sa Comunità de Quartu Sant'Aleni est autònoma. Issa est ordinada e apariciada in su Comunu, enti de autogovernu in su sìtiu de is allegas cumandadas de is leis generalis de sa Repùblica, de sa Regioni e de custu Statutu e totu.

2. S'ordinamentu giurìdicu autònomu assegurat a is tzitadinus sa partecipazioni efetiva, lìbera e democràtica, a sa atividadi polìticu-aministrativa de su Comunu.

3. In su coidu de is interessus de sa Comunità, su Comunu assegurat is initziativas po cussu chi pertocat a s'amparu de is baloris sotzialis, culturalis, econòmicus, moralis e polìticus chi ndi faint s'asienda de stòria, costumàntzias e de identidadi.

4. Fendi is tareas de amparu e adelantamentu de sa Comunità, is òrganus de su Comunu coidant, amparant, amanniant e impellint is addonus ambientalis e naturalis chi ndi caraterizant su territòriu, pigant initziativas po ddas ponni fruìbilis a is tzitadinus po agiudai a adelantai sa calidadi de vida insoru.

5. Sa Comunità amostat, atruessu de is òrganus eligidoris chi dda rapresentant, e is maneras de propònna, partecipazioni, consultazioni e de decentramentu previdias de su Statutu e de sa lei, scedas chi amostint is interessus de fundòriu cosa insoru.

Art.2 Sa autonomia

1. Sa atribuzioni a sa Comunità locali de sa titularidadi de su deretu de autonomia est su fundòriu chi ghiat a sa formazioni, cun is regulamentus e cun su Statutu, de s'ordinamentu generali de su Comunu

Art. 3 Su Statutu

1. Custu Statutu est s'òrganu de fundòriu chi assegurat e arrègulat su cumprimentu de sa autonomia normativa e apariciadora de su Comunu, cun su cuncursu de is rapresentàntzias de sa sotziedadi tzivili apariciada in sa Comunità. Cussa est sa orìgini normativa chi, atuendi is allegas costituzionalis e legisladoras de sa autonomia locali, ocasionat s'ordinamentu generali de su Comunu e ndi impellit e arrègulat is procedimentus e is àutus sighendi s'allega de sa legalidadi, de sa ecuidadi e de sa imparzialidadi cumentu puru sighendi is allegas de atùliu, de eficatzidadi e economitidadi.

2. Su Statutu acrarat is atribuzionis de is òrganus comunalis; assegurat sa

partecipazioni de is minorias previdendi puru sa atributzioni a is oposiduras de sa Presidèntzia de is Cumissionis Cunsillaris chi ant tentu tareas de scrucullu o de garantzia.

3. Is tareas de is òrganus eligidoris e de sa organizazioni amministrativa comunali funt fatas cunforma a is allegas, a is tareas e a is arrègulas cumandadas de su Statutu e de is regulamentus, in su sìtiu de sa lei.

4. Su Cunsillu Comunali at a aconciari is cuntènnius de su Statutu a su processu de adelantamentu de sa sotziedadi tzivili, asseguendi coerèntzia prena intre sa normativa statutària e is cunditionis sotzialis, econòmicas e tzivilias de sa Comunità rapresentada.

5. Sa connoscèntzia de su Statutu po parti de is tzitadinus at a èssiri assegurada in is maneras previdias de su de tres tìtulu.

Art. 4 S'arrolu de su Comunu

1. Su Comunu fait is poderius cosa sua persighendi is tareas cumandadas de su Statutu e is allegas generalis chi ddoi funt in s'ordinamentu.

2. Cuncordat sa atividadi de is òrganus cosa sua in is maneras prus profetas po arriciri, in totu, is apretus e is interessamentus generalis amostaus de sa Comunità e impellit su funzionamentu de sa organizazioni cosa sua poita potzat arrennesci a ddus acumentai.

3. Si pigat is iniziativa e impellit is interbènnidas arrechedi po assegurai sa pròpia dinnidadi a totus is tzitadinus e po ndi amparai is deretus de fundòriu, ispirendi a su traballu suu bia a allegas de ecuidadi e de solidaridadi, po barigai totus is diferènzias econòmicas e sotzialis chi esistint aintru de sa Comunità.

4. Agiudat e impellit a cussas iniziativa de is tzitadinus chi si assòtziant cun sa tarea de lompi a s'amparu e a sa biatzesa sotziali e econòmicu de sa Comunità e de cussus setoris de cussa chi sunfrint de prus apretus e abisòngius. In custu sìtiu donat atentzioni manna bia a is assòtzius de boluntariu.

5. Promovit e apoderat is iniziativa e is interbènnidas de su Stadu, de sa Regioni, de sa Provìntzia e de atrus sugetus chi traballant impari po su adelantamentu tzivili, econòmicu e sotziali de is tzitadinus.

6. Ativat e/o pigat parti a maneras de cullaborazioni e cooperazioni cun is atrus sugetus de su sistema de is autonomias, po su cumprimentu alliongiu cun is funtzionis e is servìtzius subra e pluricomunalis, cun sa tarea de: cumpriri is livellus prus mannus de atùliu e de eficatzidadi in is gestions, amanniai e agiudai s'arricidura de is agiudus sotzialis a is tzitadinus, fai baratu e giustu su cuncursu finantziàriu pediu po cussas.

7. Promovit e pigat parti a sa cumpridura de acòrdius intre is entis localis chi ddoi funt in is sètius territorialis caraterizaus de costumàntzias comunas stòrigu-culturalis e de vocatzionis econòmicu-sotzialis omogèneas, po fai prus armònicu su caminu intreu de adelantamentu de sa comunità atruessa de su cunfrontu e su coordinamentu de is

programas de donniunu.

Art. 5 Is funtzionis comunali

1. Su Comunu, istituzioni autònoma in sa unidadi de sa Repùblica, est s'enti chi còidat e rapresentat is interessus generalis de sa Comunità, sighendi sa tarea de sussidiariedadi, chi donat sa generalidadi de is tareas e de is funtzionis amministrativas a su Comunu.

2. Tocant a su Comunu totus is tareas amministrativas chi pertocant a sa popolazioni cosa sua e su territòriu cosa sua. Tenint genia primària, po s'importu cosa insoru, is funtzionis chi pertocant a is setoris de is servìtzios sotzialis, culturalis, de s'amparu de s'ambienti, de su cuncordu, s'impreu e sa valorizazioni de su territòriu e de s'adelantamentu econòmicu.

3. Is funtzionis cosa sua, chi su Comunu tenit cun titularidadi prena, funt cumprias sighendi is cumandus de su Statutu e de is regulamentus e, po cussas chi amanniant is efetus insoru bia a atras Comunità, cun acòrdius e istitutus chi apariciant e arrègulant is relatas de cullaborazioni cun custas.

Art. 6S'atividadi amministrativa

1. Sa atividadi amministrativa de su Comunu si fundat apitzus de is allegas de sa partecipazioni democràtica, de sa imparzialidadi e de sa trasparèntzia de is scioberus e de is àutus, de sa simplicadura de is proceduras e de su decentramentu.

2. Sa simplicadura de su procedimentu e de su stremu amministrativu funt sa tarea primària de is òrganus comunali, de sa apariciadura e de sa dirigèntzia cosa sua. Is arresultaus lòmpius funt averiguaus dònna tanti de su Sìndigu e naraus a su Cunsillu Comunalis e a is tzitadinus.

3. Arrègulas apòsitas de custu Statutu e de is regulamentus cumpriunt is inditaduras cumandadas de sa lei 7 de austu 1990, n. 241, assegurendi, a is tzitadinus interessaus, sa partecipazioni e sa connscèntzia de su procedimentu amministrativu.

Art. 7Caraterìsticas costitutivas

1. Su territòriu de su Comunu illàcanat cun cussu de is Comunas de Quartùciu, Casteddu, Pauli, Maracalagonis, Sinnia e cun su Mari Mediterràneu.

2. Is làcanas geogràficas chi cùngiant sa subrafaci de su territòriu de su Comunu definint a sa circoscritzioni amministrativa apitzu de sa cali cussu cumpriunt is funtzionis e is poderius cosa sua.

3. Su Comunu podit interbenni a profetu de is tzitadinus cosa sua chi siant a foras de sa circoscritzioni sua, o in su strangeri, siat atruessu de su càstiu de is interessus generalis insoru po cussu chi pertocat a su territòriu cosa sua, siat atruessu de sa spratzidura de maneras de agiudu me is logus aundi cussus funt bivendi de manera interina.

4. Sa sedi de su Comunu est posta in bia Eligio Porcu e podit èssiri mudada sceti cun àutu de su Cunsillu Comunali.

5. Su Comunu tenit su deretu de si decorai de sa bandera, de su stema e de su gunfaloni scioberaus, cun decretu de su Presidenti de su Cunsillu de is Ministrus; s'impreu e s'amosta funt disciplinaus de unu regulamentu apòsitu.

6. Su Comunu, po is costumàntzias stòrigas suas e po is merèscidas arricias de sa Comunità cosa sua, est stètiu onorau de su titulu de Tzitadi cun decretu de su Presidenti de sa Repùblica de su 9 de gennàrgiu 1959.

Art. 8 Is regulamentus comunalis

1. Is regulamentus funt àutus de fundòriu de su Comunu, apariciaus e aprovaus de su Cunsillu o de sa Giunta, a is calis tocat sa cumpetèntzia de ddus mudai o de ddus bogai arrespetendi sempri is normativas a solas.

2. Is regulamentus, apustis de s'esàmini profetosu de s'òrganu regionali de càstiu, funt publicaus po cuindixi diis in s'albu comunali e intrant in vigèntziai a coa de s'ùrtima de publicatzioni, aforas de candu bèngiant decraus apretaus e esecutàbilis deretu.

Art. 9 Programatzioni e pianificatzioni

1. Su Comunu pigat parti, cun is propònnidas cosa sua, a sa programatzioni econòmica, territoriali e ambientali de sa Regioni e cuncurrit a sa apariciadura de is programas pluriannualis e de is pianus territorialis de coordinamentu, sighendi is arrègulas de sa lei regionali.

2. In sa cumpridura dereta de is funtzionis de programatzioni e in su cuncursu a sa programatzioni regionali e provintziali su Comunu sighit sa valorizatzioni de is vocatzionis tzivilis, econòmicas, sotzialis e culturalis de sa Comunità e s'amparu de is risorsas ambientalis e naturalis de su territòriu cosa sua.

3. A s'acabu de cuncurri a sa determinatzioni de is tareas de is pianus e de is programas de su Stadu, de sa Regioni, de sa Provintzia e de is programas de àrea, su Comunu, po dònnaa tarea, si gosat de s'agiudu de is sindacaus e de is formatzionis sotzialis, econòmicas e culturalis chi traballant in su territòriu cosa sua.

4. Is funtzionis de custu articulu pertocant a sa cumpetèntzia de su Cunsillu Comunali, de su Sìndigu e de sa Giunta, sighendi is atribuzionis de donniunu.

5. In sa apariciadura de sa programatzioni stratègica si ponit menti a is ligòngius e a is oportunitadis donadas de sa Unioni Europea.

Art. 10 Participatzioni a sa atividadi politicu-aministrativa

1. Su Comunu apariciat e amostat sa autonomia cosa sua pighendi cumentis balori de fundòriu sa participatzioni bera de totus is tzitadinus a sa atividadi politica e aministrativa de s'Enti.

Art. 11 Amparu de sa saludi e de sa seguresa sotziali

1. Su Comunu cuncurrit a assegurai, in su sìtiu de is cumpetèntzias suas, su deretu a sa saludi. Traballat po sa cumpridura de unu servìtziu profetosu de assistèntzia sotziali, castiendi prus chi totu a is bècius, a is minoris, a is malisanus e a is inàbilis. Promovit una polìtica de sa saludi, cun sa tarea de sa prebènnida e de sa educatzioni sanitària, atruessu de cunvegnus cun sa partecipatzioni de espertus de su setori e cun informatzioni cumpria. Agiudat a sa fichidura sotziali e de su traballu po sa genti sbantaxada, puru cun parecipatzionis deretas a cooperativas o a entis e istitutzionis sotzialis.

2. Su Comunu promovit s'amparu de sa vida umana, de sa persona e de sa famìllia, sa valorizatzioni sotziali de sa maternidadi e de sa paternidadi, assegurendi apoderamentu a sa curreponsabilidadi de is babus e mamas in s'imbordigamentu de incuru e de educatzioni de is fillus.

3. Su Comunu arreconnoscit is lobas de fatu imbordigadas in su apoderamentu a pari-pari, fundadas apitazus de is cumandus de mutualidadi e chi ddoi funt aintru de s'apòsitu Registru Comunali.

4. Su Comunu, de acòrdiu cun sa conventzioni de is Natzionis Unidas po cussu chi pertocat a su deretu de is pipius e de is piciocheddus, cuncurrit a promovì su deretu a studia e a si furmai in unu quadru istitutzionali ispirau a sa libertadi de educatzioni.

5. Su Comunu depit assegurai a totus is tzitadinus in su territòriu cosa sua su deretu a sa acessibilidadi boghendi dònna tressadura architetonica chi nc'est.

6. Su Comunu apariciat e promovit atividadis de stùdiu, de sbèliu, de spàssiu, culturalis, sportivas, de su traballu e de s'imparamentu de is tzitadinus.

7. Su Comunu apoderat a is atividadis e a is iniziativas de su boluntariau e de is assòtzius liberus.

Art. 12 Amparu de s'asienda naturali, stòriga e artìstica

1. Su Comunu impreat is maneras arrechèdias po chistiri e amparai a s'ambienti, fendi pianus po sa chistidura de s'asienda naturali e po sa bogadura de is càusas de imbrutadura.

2. Amparat a s'asienda stòriga, artìstica, archeològica, architetonica, paesagìstica e ètnica, assegurendi·ndi su gosu a totu sa culletividadi intrea.

Art. 13 Promovidura de sa cultura, sport e tempus liberu

1. Su Comunu promovit a s'adelantamentu de s'asienda culturali de su logu, puru in is amostas cosa sua de l'ingua, costùmini e traditzionis, cun resguardu mannu bia a sa sugetividadi de sa genti sarda.

2. Impellit e favoressit su sport diletantìsticu e su turismu sotziali e giovanili.

3. Po lompi a custas tareas, su Comunu promovit s'istitutzioni de entis, organismus,

consultas, assòtzius e istitutzionis. Promovit in prus sa apariciadura de struturas bonas e servìtzius cun sa tarea de ndi assegurai sa partecipazioni a sa comunidadi.

4. Is maneras de impreu de is struturas, servìtzius e impiantus ant a èssiri disciplinadas de unu regulamentu apòsitu sighendi is indirtzus de su Cunsillu Comunali.

Art. 14 Produssidura, agricultura, artesanau e turismu

1. Su Comunu coòrdinat e ghiat is atividadis cumercialis e favoressit s'organizazioni razzionali de su aparau spratzinadori, cun sa tarea de assegurai sa funtzionalidadi mellus de is servìtzius.

2. Amparat e promovit s'adelantamentu de s'artesanau, cun resguardu mannu bia a cussu costumau chi est sa carateristica distinghidora de sa Comunidadi quartesa.

3. Agiudat a is atividadis turìsticas impellendi su rennoamentu e sa amanniadura ordinada de is trastus e de is servìtzius turìsticus e arricidoris.

4. Promovit e apoderat a is formas assotziadoras, de autogestioni e de cooperazioni.

5. Amparat a s'agricultura e promovit cussa biològica; favoressit s'adelantamentu de atividadis allongiadas cun su agriturismu.

Art. 15 Assètiu, amparu e impreu de su territòriu

1. Su Comunu cumprìt unu assètiu orgànicu e echilibrau de su territòriu:

a) favoressend sa calidadi de is logus de traballu, sa frunidura de infrastruras, s'arricida e/o s'afilladura de servìtzius allongiaus cun issus;

b) aparicendi pianus de adelantamentu de s'edilìtzia residentziali pùblica;

c) fendi sa cumpridura de obras de urbanizazioni primària e secundària, sighendi is apretus e is prioridadis cuncordadas de is trastus urbanìsticus atuadoris;

d) aparicendi trastus de prebènnida, de prontu interventu, de donai a s'averiguadura de sciacus pùblicos puru po amparai a s'ambienti.

2. Su Comunu, atruessu de is òrganus cosa sua e sighendi is cumpetènzias specifìcas, fait su scrucullu e sa vigilàntzia urbanìstica e edilìtzia e ndi castigat is violaduras, cun is trastus cumandaus de is leis de su Stadu, de sa Regioni Autònoma de Sardigna e de is regulamentus Comunalis.

Art. 16 Tragus, circolazioni

1. Su Comunu favoressit s'atùliu de s'esercìtziu de is tragus pùblicos e de sa circolazioni e po custa tarea podit apariciari maneras profetosas de cullaborazioni e de assòtziu cun atrus Comunas e cun sa Provìntzia.

Art. 17 Is servìtzius pùblicos e is maneras de gestioni

1. Su Comunu, po sa gestioni de is servìtzius chi po sa natura e sa mannesa insoru no podint èssiri fatus de manera dereta, podit cuncordai:

- a) sa apariciadura de aziendas municipalizadas;
- b) sa partecipazioni a cunsòrtzius o a sotziedadis po atzionis puru chene capitali pùblicu prevalenti;
- c) sa stipulazioni de una conventzioni apòsita cun atrus Comunu interessaus a sa gestioni de su servìtziu;
- d) sa entrega a atrus;

Art. 18 Rapresentàntzia de sa Comunitadi

1. Su Comunu rapresentat is interessus de sa Comunitadi bia a is sugetus pùblicus e privaus chi faint atividadis o faint servìtzius chi pertocant a sa popolazioni e a su territòriu.
2. Su Comunu providit a ghiai sa frunidura de is servìtzius donaus de sugetus pùblicus e privaus po ddus aconciat cun is apretus de sa Comunitadi.

Art. 19 Adelantamentu sotziali, culturali e econòmicu

1. S'adelantamentu econòmicu, sotziali, culturali cumentu puru sa valorizazioni de is risorsas territorialis, ambientalis e umanas est persighiu atruessu de sa promovidura e sa gestioni dereta e indereta de is servìtzius in is maneras de custu Statutu, cumentu puru atruessu de is atividadis de pianificazioni, programazioni e promotzioni bia a sugetus pùblicus e privaus chi traballant in su Comunu.

Art. 20 Princìpiu de is stremus profetosus po sa cumpridura de sa paridadi mascu-fèmina: Cumissioni Pari Oportunidades.

1. Su Comunu promovit stremus chi depant tirai is tressas chi arrescint diaderus sa partecipazioni de is fèminas a su mundu de su traballu, a sa vida sotziali, econòmica e polìtica; in prus, cun sa tarea de apariciat mellus is polìticas chi pertocant a sa cumpridura de oportunitadis agualis po mascus e fèminas apariciat sa Cumissioni de is Pari Oportunidades .
2. Regulamentu apòsitu cunsillari cumprit is allegas chi ddoi funt in custu artìculu.

Art. 21 Traballu, formatzioni e polìticas de sa paridadi

1. Su Comunu imperendi is leis natzionalis e regionalis at a apariciat is polìticas de formatzioni, de traballu, de indiritzu, de is pari oportunitadis de is traballadoris furisteris residentis cuforma a sa Lei de su 28 de friàrgiu 1990 n. 39 e mudàntzias e aciuntas sghidoras.
2. Regulamentu apòsitu at a cumpriri is allegas chi ddoi funt in custu artìculu.

Art. 22 Chistidura de is àutus, de is documentus e sa connoscèntzia insoru.

1. Su Comunu, arrespetendi is arrègulas vigentis apitzus de custa allega, assegurat sa

consultabilità de s'arcivu cosa sua, apariciau de su muntoni de totus is documentus prodùssius in su petantis de sa atividadi cosa sua. Cussus funt chistius po parti de su servitziu arcivisticu comunali.

Art. 23. Impreu de sa Lìngua sarda

1. Su Comunu de Quartu Sant'Aleni promovit e valorizat s'impreu de sa lìngua sarda cumeti sinnu distinguidori de sa appartenèntzia de sa comunitadi quartesa a sa identidadi de su pòpulu sardu. Is atividadis de amparu de su sardu funt ispiradas, in prus chi a s'artìculu 6 de sa Costitutzioni, puru a sa lei de su stadu 482/99 e regionali 26/97.

2. S'Aministratzioni Comunali amparat de manera particolari e spetziali sa varianti quartesa de sa lìngua sarda, cun riferimentu particolari a sa oralidadi e a is interbènnidas a boxi. Su quartesu est promòviu in dònna s'itru de sa Aministratzioni Comunali.

3. Is componentis de su Cunsillu Comunali e de is atrus òrganus a struttura collegiali, cumprèndias puru is Cumissionis, podint impreai, in su traballu de is organismus e totu, sa lìngua amitia a amparu (art. 7 comma 1 ex. L. 482/99).

4. Casumai unu o prus componentis de is òrganus cullegialis de su comma 3 decrarint de no connosci sa lìngua sarda depit èssiri assegurada deretu sa furriadura italiana. Po is interbènnidas no ddoi est òbligu de furriadura scritta (art. 7 comma 3 ex L. 482/99).

5. De is interbènnidas fatas in lìngua sarda sa Presidèntzia de is òrganus collegialis e su comma 3 assegurat is verbalizatzionis. In sa fàsia s'ighidora de deliberatzioni e in is documentus s'ighidoris, at a podi èssiri impreada sa lìngua sarda, mancarì acumpangiada sempri, po parti de sa Presidèntzia de is òrganus collegialis, de su testu currispondidori in lìngua italiana (art. 23, comma 2 ex L.R. 26/97).

6. In sa currispondèntzia e in is comunicatzionis a boxi de is tzitadinus deretas bia a s'Aministratzioni est possìbili a impreai sa lìngua sarda (art. 23 comma 3 ex L.R. 26/97).

7. In is comunicatzionis internas a is ufizius est possìbili impreai sa lìngua sarda de manera scritta puru.

8. Est possìbili apariciai àutus pùblicos in lìngua sarda e de su logu cun sa furriadura alliongiada in lìngua italiana. Si is àutus distinaus a impreu pùbliku s'iant scritus in sa lìngua sarda e de su logu ocasionant efetus giurìdicus sceti cussus àutus e deliberatzionis scritas in lìngua italiana (art. 7 comma 4 ex L. 482/99).

9. S'Aministratzioni Comunali providit a sa furriadura in sardu de custu Statutu Comunali.

TÌTULU SEGUNDU
IS ÒRGANUS COMUNALIS

SU DE DUUS TÌTULU: IS ÒRGANUS COMUNALIS

PRIMU CÀBUDU: ORDINAMENTU

Art. 24 Arrègulas generalis

1. Funt òrganus istituzionalis de su Comunu su Sìndigu, su Presidenti de su Cunsillu, su Cunsillu Comunali, sa Giunta, is Presidentis de is Circoscritzionis, is Cunsillus circoscritzionali.
2. Su Sìndigu, su Cunsillu Comunali e is cunsillus circoscritzionali funt elìgius a sufràgiu universali, sighendi is arrègulas vigentis.
3. Tocant a is òrganus comunalis sa funtzioni de rapresentàntzia democràtica de sa Comunità e sa apariciadura de is allegas e de is cumpetènzias cumandadas de su Statutu in su sìtiu de sa lei.
4. Funt òrganus burocràticus de su Comunu: su Diretori Generali, su Segretàriu Generali e is Dirigentis.
5. Sa lei e su Statutu arrègulant sa spratzidura de is tareas e is relatas intre is òrganus comunalis.

SU DE DUUS CÀBUDU: SU SÌNDIGU

Art. 25 Arrolu e funtzionis

1. Su Sìndigu est s'òrganu responsàbili de s'aministrazzioni de su Comunu.
2. Rapresentat su Comunu, tzèrriat e ghiat sa Giunta, scioberendi s'òrdini de sa dii.
3. Cumentis Presidentis de sa Giunta comunali cuncordat s'atividadis de is Assessoris, po sa cumpridura de is tareas scioberadas in su documentu programàticu.
4. Sovraintendit a su funzionamentu de is servìtzis e de is uffizis e a sa cumpridura de is àutus, cun s'agiudu de is Assessoris e cun sa cullaborazioni, donada sighendi is inditaduras cosa sua, de su Diretori Generali, de su Segretàriu Generali e de is Dirigentis.
5. Cumentis Uffiziali de Governu subraintendit a is servìtzis de cumpetèntzia statali entregaus a su Comunu, sighendi cussu chi est cumandau in is leis de sa Repùblica.
6. Cumprit is tareas chi ddis ant donau is leis regionalis, sighendi is maneras previdias de cussas leis e totu e de custu Statutu puru.
7. Su Sìndigu est su garanti de s'arrespetu de sa lei, de sa cumpridura de su Statutu, de sa posta in menti de is regulamentus.

8. Su distintivus de su Sìndigu est sa fàscia tricolori cun su stema de sa Repùblica e su stema de su Comunu, chi si depit ponni a tracolla.

Art. 26 Cumpetèntzias

1. Su Sìndigu cumentì òrganu de amministratzioni:

- a) subraintendit a su funtzionamentu de is servìtzios e de is ufìtzios comunali;
- b) subraintendit a sa cumpridura de is tareas Statalis e regionalis donadas o delegadas a su Comunu e ndi torrat sceda a su Cunsillu;
- c) podit arresci, sprighendi su poita, s'arricidura de àutus specifìcus chi pertocant sa atividadi de is Assessoris a solus po ddus ponni asuta de su scrucullu de sa Giunta;
- d) tenit sa sceda de delegai, cunforma a is arrolus respetivus, a is Assessoris s'arricidura de àutus e providementus de importu de aforas, chi sa lei o su Statutu no apant donau gai a cussus;
- e) promovit e si pigat inìtzias po serrai acòrdius de programatzioni cun totus is sugetus pùblicos e/ privaus prevìdius de sa lei;
- f) apariciat is comìtzios po is referendum comunali;
- g) promovit si pigat inìtzias chi potzant assegurai chi ufìtzios, servìtzios, aziendas spetzialis, istituzionis e Sotziedadis chi pertocant a su Comunu cumprant is tareas cuncordadas de su Cunsillu;
- h) spratzinat inditaduras a su Diretori Generali, o a su Segretàriu Generali, e a is Dirigentis sighendi is indirizus funtzionalis e de vigilàntzia apitzus de sa gestioni amministrativa intres de totus is ufìtzios e servìtzios;
- i) fait, atruessu cun decretu apòsitu, ascurtada sa Giunta, is tareas de indiritzu polìticu-amministrativu chi potzant cuncordai is tareas e is programas de fai po parti de is Dirigentis responsàbilis de is setoris apariciadoris de s'Enti e averìguat sa currispondèntzia de is arresultaus entregaus; in cussus acontèssius tenit poderius de arremprasadura e de avocatzioni, sceti si ddoi funt arresonis de apretu e urgèntzia;
- l) scioberat is oràrius de obèrrida a sa genti de is ufìtzios e servìtzios comunali, ascurtendi is dimandas de partecipatzioni;
- m) impreat totus is atrus providementus de genia discretzionali, no collegiali o gestionali chi su Statutu a craru no apat donau a su Diretori Generali, a su Segretàriu Generali o a is Dirigentis;
- n) nòminat a is Dirigentis responsàbilis de is setoris o de staff e donat e cuncordat is incàrrigus dirigtzialis e cussus de cullaboratzioni de aforas;
- o) nòminat, *intuitu personae*, a su Diretori Generali cunforma a s'art. 108 de su D. Lgs. 267/2000 e, in prus, puru una dotatzioni orgànica extra a is Dirigentis e/o a is funtzionàrius de staff o a is dipendentis cunforma a is artìculus 90 e 110 de su D. Lgs. 267/2000.

Art. 27 Vigilàntzia

1. Su Sìndigu po cussu chi pertocat a is tareas de càstiu:

- a) arricit, deretu in totus is ufìtzios e servìtzios, informatzionis e àutus puru resguardaus;
- b) impellit, atruessu de su Segretàriu o su Diretori Generali, scrucullus e averiguaduras amministrativas apitzu de sa atividadi intrea de su Comunu, cunforma a sa Lei de su 31 de mes'e idas 1996, n° 675;
- c) fait ottus is àutus chistidoris de is deretus de su Comunu, candu no funt

cumprius de is Dirigentis;

d) podit cumandai sa arricidura de àutus, documentus e informatzionisme is sotziedadis po atzionis chi pertocant a s'Enti, atruessu de is rapresentantis legalis de cussas, e ndi informat a su Cunsillu Comunali.

Art. 28 Atributzionis po is servìtzius statalis

1. Su Sìndigu po cussu chi pertocat a is atributzionis po si Servìtzius Statalis:

a) providit a cumpri is tareas de politzia giuditziària candu sa lei ndi donat sa califica de ufiziali de Politzia Giuditziària;

b) subraintendit, spratzinat diretivas e fait su càstiu bia a is servìtzius de cumpetèntzia statali;

c) subraintendit, fendiddu sciri a su Prefetu, a is servìtzius de càstiu e a cussu chi imbòrdigat a sa seguresa, s'òrdini pùblicu e sa protetzioni tzivili;

d) spratzinat provedimentus de importu e apretaus e si pigat is iniziativas sighidoras;

e) spratzinat àutus e scioberus apitzus de sa circolatzioni de arruga;

2. Su Sìndigu, in prus, subraintendit a sa pompiada de is registrus de stadu tzivili e de anàgrafe de sa popolatzioni e is cumpriduras entregadas a issu de is leis de allega eletorali, de leva militari e de statistica; spratzinat is àutus entregaus de leis e regulamentus apitzu de òrdini e seguresa pùblica, de sanidadi e de igiene, edilìtzia e politzia locali, cun tareas de sarvesa pùblica.

Art. 29 Poderius de ordinàntzia

1. Su Sìndigu, cumentu cabu de sa Aministratzioni comunali, tenit su poderiu de spratzinai ordinàntzias po apariciai sa sighidura, po parti de is tzitadinus, de arrègulas de lei e de is regulamentus o po inditai cumpriduras e cumportamentus fatus arrechèdius de s'interessu generali o de s'acontèssiu de cunditzionis particularis.

2. Is àutus chi ddoi funt in su comma innoi asuba depint èssiri arrexonaus e funt spratzinaus arrespetendi is allegas generalis de s'ordinamentu giuridicu e cun su càstiu de is arrègulas ch ghiant is procedimentus aministrativus.

3. In acontèssiu de ausèntzia o arrescidura de su Sìndigu, cussu chi ddu arremprasat cumprit puru is tareas de custu artìculu e de s'artìculu 28.

4. Is genias de publicidadi de is àutus numenaus e cussas de partecipatzioni de is imbordigaus deretus funt cuncordadas in custu Statutu e totu, castiendi is cumandus de s'art. 26 de sa Lei 7/8/90 n. 241. Còpia de is àutus numenaus at a depi èssiri imbiada a su Presidenti de su Cunsillu Comunali, a is Capigruppo Cunsillari, a is Presidentis de is cumissionis cunsillaris cumpetentis de cussa allega e a is Presidentis de is circoscritzionis.

Art. 30 Rapresentàntzia e coordinamentu

1. Su Sìndigu rapresentat a su Comunu in is òrganus de is cunsòrtzius aundi cussu pigat parti e podit delegai a unu Assessori a cumpri cussa tarea.

2. Su Sìndigu rapresentat su Comunu in sa promovidura, serrada e cumpridura de is

acòrdius de programa, sighendi is maneras previdias po cussus de custu Statutu e totu.

3. Tocat a su Sìndigu, in su sìtiu de sa disciplina regionali, sighendi is indiritzus amostaus de is butegas e de is servìtzios pùblicos; is oràrius de obèrrida e serrada a sa genti de is ufìtzios stesias de is aministratzionis pùblicas, cuncordendi in is ordinàntzias imbordigadas is provedimentus prus bonus cun sa tarea de aconciau sa faidura de is servìtzios bia a is apretus intreas e generalis de is tzitadinus.

In sa cumpridura de custas competèntzias su Sìndigu at a depi ativai maneras de partecipazioni e consultatzioni sighendi is arrègulas e is trastus previdius de su Statutu e de is regulamentus.

Art. 31 Decadèntzia de sa càrriga de Sìndigu

1. Sa decadèntzia de sa càrriga de Sìndigu acontessit po custas arresonis:

- a) averiguadura de una arresoni de inelegibìlidadì o de incompatibìlidadì;
- b) in is atrus acontèssiu previdius de sa lei.

Art. 32 Su Vicesìndigu

1. Su Sìndigu, po is acontèssius de ausèntzia o arrescidura previdius de sa lei, nòminat intre is cumponentis de sa Giunta su Vicesìndigu e ndi donat sceda a su Cunsillu in sa prima setziada sighidora a is eletzionis impari cun sa propònnida de is indiritzus generalis de Governu.

2. In acontèssiu de ausèntzia o arrescidura a su matessi tempus de su Sìndigu e de su Vicesìndigu ndi pigat po cussu tempus totus is tareas s'Assessori prus bèciu de edadi.

SU DE TRES CÀBUDU: SU CUNSILLU COMUNALI

Art. 33 Arrolu de su Cunsillu

1. Su Cunsillu Comunali est òrganu de indiritzu e de castiada Polìticu-Aministrativa.

2. Tocat a su Cunsillu agatai e interpretai is interessus generalis de sa Comunità e scioberai, imbordigaus a cussus, is caminus chi ghiant e apariciant is atividadis e aministratzioni e gestioni operativa, pompiendi apitzus de cussas atividadis su càstiu politicu-amministrativu po assegurai chi su traballu intreu de s'Enti lompat a is tareas cumandadas cun is àutus de fundòriu.

3. Su Cunsillu sighit in càrriga finsas a sa eligidura de cussu nou, fendi sceti, a pustis de sa inditzioni de is Cumitzius eletoralis, s'arricida de is àutus apretaus e chi no podint abetai.

4. Is setziadas de su Cunsillu comunali funt pùblicas. Su Reglamentu scioberat is acontèssius de candu su Cunsillu si depit atobiai in setziada cuada.

Art. 34 Funtzionis de indiritzu politicu-aministrativu

1. Su Cunsillu Comunali scioberat e amostat is indiritzus politicus aministrativus cosa sua, sighendi is allegas cuncordadas in custu Statutu, scioberendi sa programatzioni generali de s'Enti e arricendi is àutus de fundòriu chi ndi ghiant sa atividadi de manera operativa, cun resguardu particulari:

- a) a is àutus chi ocasionat su quadru istituzionali comunali chi imbòrdigantis regulamentus po su funtzionamentu de is òrganus eligidoris e de is istitutus de partecipazioni popolari, is ordinamentus de su decentramentu, is organismus apariciaus po sa gestioni de is servìtzius, is assòtzius e de cullaborazioni cun is atrus sugetus;
- b) a is allegas generalis chi faint s'ordinamentu apariciadori comunali, cumentis is regulamentus po su cumprimentu de is tareas e de is servìtzius, s'ordinamentu de is ufìtzius, de su personali e de s'organizazioni aministrativa de s'Enti, sa disciplina de is tributus e de is tarifas;
- c) a is àutus de pianificazioni finantziària annuali e pluriennali, a is balantzus, a is programmas operativus de is interbènnidas e progetus chi faint is pianus de imbistimentu;
- d) a is àutus chi cracant apitzus de sa consistèntzia de s'azienda immobiliari de s'enti e a su cuncordu de is caminus po s'impreu e sa gestioni cosa sua;
- e) a is àutus de pianificazioni urbanistica e econòmica generali e a cussus de programatzioni faidora;
- f) a is caminus bia a is aziende spetzialis e a is entis dipendentis, oagus o postus asuta de càstiu.

2. Su Cunsillu, cun is àutus de pianificazioni operativa e finantziària annuali e pluriennali, cuncordat, po dònna programa, interbènnida e progetu, is arresultaus chi faint is tareas de sa gestioni de s'enti e detèrminat is tempus po sa cumpridura insoru.

3. Su Cunsillu podit cumandai, cun is àutus de fundòriu aprovaus, is critèrius-ghia po sa cumpridura insoru bera e podit cumintzai risolutzionis:

- a) po sa cumpridura de su documentu de is indiritzus generalis de governu;
- b) po promovì, liai, impelli sa atividadi de is atrus òrganus gestionalis e su traballu de s'organizazioni.

4. Su Cunsillu podit amostai inditaduras po sa afilladura po parti de sa Giunta de scioberus chi is Revisoris de is contus ant s'innalau s'abisòngiu po s'apretu de genia finantziària e de s'azienda, chi pertocant a s'aministratzioni e a sa gestioni econòmica de is atividadis comunali.

5. Su Cunsillu podit amostai, a su tempus de sa nòmina e in dònna atru acontèssiu andi si ndi agatit s'apretu, caminus po incarrerai su traballu de is rapresentantis numenaus, sighendi su curriculum professionali apòsitu chi bessit a foras de s'albu de is rapresentantis de su Comune, in entis, aziende, cunsòrtzius, organismus sotziedàrius e assotziadoris, sighendi is programmas generalis de politica aministrativa de su Comune.

6. Su Cunsillu podit pigai scioberus, chèscias, òrdinis de sa dii po amostai, arrespetendi s'allega de sa pluralidadi de pensamentu, sa sensibilidadi e is orientamentus in cussu e totu apitzus de allegas e acontèssius de genia politica, sotziali, econòmica, culturali e interpretai, cun custus àutus, sa partecipazioni de is tzitadinus a is eventus chi imbordigant a sa Comunità natzionali, regionali, provintziali e de àrea prus manna.

Art. 35 Funtzionis de càstiu políticu-aministrativu e de gestioni

1. Su Cunsillu Comunali cumprìt is tareas de càstiu cosa sua políticas-aministrativas, cun is maneras scioberadas de custu Statutu e de is regulamentus, po is atividadis:

- a) de is òrganus e de sa organizatzioni operativa de su Comunu;
- b) de is istituzionis, aziendas spetzialis, gestioni cunventzionadas e coordinadas, cunsòrtzius, sotziedadis chi tenint cumentis tarea sa cumpridura de is servìtzus pùblicos e sa apariciadura de obras, progetus, interbènnidas, fatus po contu de su Comunu o a is calis cussu a totu nci pigat parti cun atrus sogetus.

2. Su Cunsillu Comunali po sa cumpridura de sa funtzioni de càstiu prevìdia de is leis e de custu Statutu:

- a) agatat is maneras de cullaboratzioni cun su Cullègiu de is Revisoris po su traballu impari de su stremu de càstiu apitzus de sa regularidadi contàbili e finantiària;
- b) cuncordat trèminis e maneras po sa presentatzioni po parti de sa Giunta de sa relata annuali apitzus de sa atividadi gestionali castiendi sempri a is indirizus scioberaus;
- c) scioberrat is maneras po sa cumpridura de su càstiu e de su scrucullu apitzus de istituzionis, cunsòrtzius, aziendas e sotziedadis chi pertocant a su Comunu po sa cumpridura de is indirizus e sa lòmpera de is tareas;
- d) donat is scioberaus po sa disciplina de is genias e maneras de scrucullu de aintru de sa gestioni.

3. Bia a sugetus numenaus in su puntu b) de su comma 1. sa atividadi de càstiu est fata in is trèminis e cun is maneras prevìdias de sa lei e de is ordinamentus de donniunu de cussus.

4. Su Cunsillu averiguat, cun is maneras chi ant a èssiri scioberas de su regulamentu, sa coerèntzia desa atividadi de is sogetus e organizatzioni de su comma 1., cun is caminus generalis amostaus de cussu e totu e cun is àutus de fundòriu aprovaus, po averiguai chi su traballu intreu de s'aministratzioni de sa Comunità sigat is allegas cumandadas de su Statutu e sa programatzioni generali arricia.

5. Su Regulamentu previdit maneras e tempus po s'entrega a su Sìndigu, a sa Cumissioni cunsillari permanenti cumpetenti, a sa Giunta Comunali e a su Cullègiu de is Revisoris de is contus de is arresultaus numenaus in su comma innoi asuba e de is inditadoris de tempus longu, mesanu e curtzu po su scrucullu sistemàticu de sa gestioni.

6. Sa Giunta arrexonat cun su Cunsillu, a su manu una borta a s'annu, apitzus de su stadiu de cumpridura de su Programa Aministrativu e ddi fait sciri totus is provedimentus arricius.

Art. 36 Cumpetènzias de su Cunsillu

1. Su Cunsillu Comunali tenit cumpetèntzia escludora apitzus de is cumpriduras de is funtzioni de fundòriu po s'organizatzioni e s'adelamentu de sa Comunità e po apariciari is indirizus de política aministrativa, sceti po custus àutus de fundòriu:

- a) is statutus de s'Enti e de is aziendas spetzialis de s'art. 111 chi sighit is regulamentus chi no pertocant a atrus òrganus;

- b) is programmas, is relatas previsionalis e programàticas, is pianus finantzàrius e is programmas de obras pùblicas, is balantzus annualis e pluriennalis e mudàntzias relatas, is contus consuntivus, is pianus territorialis, urbanisticus, particularegiaus e de recuberamentu, is programmas annualis e pluriennalis po sa cumpridura cosa insoru, is dèrogas eventualis a cussus, is parris de donai in is maneras chistionadas;
- c) is conventzionis intre su Comunu e atrus Entis Pùblicas, sa apariciadura e sa mudàntzia de is maneras assotziadoras;
- d) s'apariciadura, is tareas e is arrègulas apitzus de su funtzionamentu de is organismus de detzentramentu e de partecipazioni;
- e) s'arricidura dereta de is servìtzios pùblicos, sa cumpridura de istituzionis e de aziendas spetzialis, sa entrega de is servìtzios pùblicos, sa partecipazioni de s'Enti Locali a sotziedadis de capitalis, s'affilladura de atividadis o de servìtzios imperendi sa conventzioni;
- f) s'apariciadura e s'ordinamentu de tributus, sa disciplina generali de is tarifas po sa arricidura de benis e servìtzios;
- g) is indiritzus de sighiri po parti de is aziendas pùblicas e de is entis dependentis, agidaus o postus asuta de càstiu;
- h) sa cumpridura de mutuus e sa spratzinadura de is imprèstidus obligatzionàrius;
- i) is gastus chi imbòrdighint a is balantzus po is esecitzios sighidoris, a foras de cussas chi pertocant a is allogaduras de domus e a sa entrega e frunidura de benis e servìtzios de tipu sighidori;
- l) is còmporas e is pinnigaduras imobiliarias, is cuncàmbius alliongiaus, is arrendus e is cuncessionis chi no siant prevèdius a craru me is àutus de fundòriu de su Cunsillu o chi no ndi faint una esecuzioni e bia, e chi, de dònna manera, no fichint aintru de sa aministratzioni costumada de funtzionis e servìtzios de competèntzia de sa Giunta, de su Diretori Generali, de is Dirigentis o de atrus funtzionàrius;
- m) sa apariciadura de is indiritzus po sa nòmina e su scioberu de is rapresentantis de su Comunu aintru de Entis, Aziendas e Istituzionis cumentu puru su scioberu de is rapresentantis de su Cunsillu aintru de Entis, Aziendas e Istituzionis resguardada a cussu de manera crara po parti de sa lei.

2. Is nòminas e is entregas depint èssiri fatas aintru de cuarantaxincu diis de s'insediamentu de su Cunsillu Comunali o aintru is trèminis de scadèssida de s'incàrrigu de innantis. In acotèssiu de deliberatzioni fartada, si providit cunforma a s'art. 136 de su D. Lgs. 267/2000.

3. Is deliberatzionis cunforma a is allegas de custu artìculu no podint èssiri pigadas de caminu apretau po parti de atrus òrganus de su Comunu , a foras de cussas chi pertocant a is mudàntzias de balantzu arricias de sa Giunta de ponni asuta de ratìfica de su Cunsillu in is sessanta diis sighidoras, a pena de decadèntzia.

4. In prus funt de competèntzia de su Cunsillu Comunali is àutus e is provedimentus chi ddi pertocant siat de atras disposiduras de lei vigentis siat de leis sighidoras, cumentu puru is àutus chi pertocant a is decraratzionis de inelegibilitadi e incompatibilitadi de is Cunsilleris Comunalis e a sa surrogatzioni o arremprasadura cosa sua.

Art. 37 Nòminas de is rapresentantis

1. Su Cunsillu Comunali providit a sa nòmina, scioberu e bogadura de is rapresentantis cosa sua me is òrganus de entis, aziendas e istituzionis chi traballant in su s'itìu de su Comunu, o puru de cussus chi dependint o chi funt castiaus de issus, cunforma a sa lìt.

m, de su comma 1 de s'art. 36 de innantis.

2. Custas aministratzionis de is Entis de is Aziendas spetzialis e de is istituzionis dipendentis acabant sa càrriga insoru in prus chi po is acontèssius previdius puru in cussu chi su Cunsillu Comunali aprovit una motzioni de scunfiantza costrutiva asseguendi a su tempus sa nòmina de atrus aministradoris respetu a cussus bogaus po scunfiantza o si bessant aforas cumentis ausentis no giustificaus po tres setziadas in su petantis de s'annu solari.

Art. 38 Maneras de impreu de is funtzionis de indiritzu e de scrucullu

1. Sa funtzioni de programatzioni de su Cunsillu Comunali si amostat in manera particulari arricendi, cun sa tarea de sa predisposidura de su balanzu annuali e pluriennali, unu documentu de indiritzus apitzus de su caminu intreu de is addonus a disposidura po s'Enti castiendi a is intradas, a is gastus correntis e a is imbistimentus.

2. Su Cunsillu impreat àutus de indiritzu generali po setoris omogèneus a solus, coerentis cun su scaleri temporali de is documentus contàbilis, chi imbordigant a su Sìndigu e a sa Giunta sua e chi depint amostai in trèminis de calidadi e de cantidadi is arresultaus de lompis, is addonus imbordigaus in totu, su balanzu de is risorsas ambientalis e de s'azienda, sa spratzidura de su tempus previdia po sa lòmpida de is arresultaus, is gastus de is interbènnidas a regime. Custus indiritzus si pigant unu sìtiu intersetoriali candu si depit favoressi s'adelamentu de is atividadis sinèrgicas.

3. Su Sìndigu ascurtada sa Giunta comunali dònna tanti, donat a su Cunsillu relatas globalis e po setori, sighendi is inditadoris chi permitant de agradessi, puru asuta de su profilu temporali, sa congruidadi de su caminu de sa gestioni po cussu chi pertocat a is tareas scioberadas de su Cunsillu e totu.

4. Puru cun sa tarea de assegurai a is Cunsilleris Comunalis su scioberu de ativai su Cumitau Circoscritzionali de Càstiu o su Cumitau Regionali de Càstiu me is acontèssius e me is maneras cunformas a s'art. 127, commas 1 e 2, de su D. Lgs. 267/2000, totus is deliberatzionis impreadas de sa Giunta e de su Cunsillu benint imbiadas a lestru a is Cunsilleris Comunalis e a is Presidentis de is Circoscritzionis imperendi is maneras previdias de su regulamentu de su Cunsillu Comunali.

5. Is Ordinàntzias de is Cumitaus de Càstiu depint èssiri imbiadas a lestru a is Capigruppo cunsillaris.

6. Po sa pedidura de ponni is delìberas de Giunta e de su Cunsillu Comunali asuta de su càstiu de legitimidadi de s'òrganu regionali chi ddi pertocat nci bolit sa firma de tres Cunsilleris assignaus a su Comune, po is allegas inditadas in s'art. 29 de sa L.R. 13 de su mes'e idas 1994, n. 38 e mudàntzias e aciuntas sighidoras.

7. Su Sìndigu e is Assessoris torrant sceda, in is trèminis previdius de su regulamentu cunsillari, a is pediduras e a dònna atra istantza de sindacau scruculladori presentadas po parti de is Cunsilleris. Su regulamentu de su Cunsillu cumandat de manera intrea custa allega.

8. Po assegurai mellus a una connoscèntzia prus crara de sa atividadi aministrativa in sa interessa sua, is Determinatzionis de is Dirigentis, impari cun sa publicatzioni in s'Albu Pretòriu de fai a su tempus de s'affilladura insoru, depint lompis a lestru a is Capigruppo Cunsillaris.

Art. 39 Mandus e impèrius de is Cunsilleris Comunalis

1. Is Cunsilleris Comunalis intrant in càrriga in su tempus de sa proclamatzioni cosa insoru, est a nai, in acontèssiu de càmbiu, apena arricia de su Cunsillu sa deliberatzioni chi ndi pertocat.
2. Is Cunsilleris Comunalis rapresentant sa Comunitadi e cumprint is tareas cosa insoru chene ligòngiu de mandau, cun libertadi prena de pensamentu e de votu.
3. Sa càrriga de Cunsilleri est a indonu. Is indennidadis chi tocant a dònna Cunsilleri funt cumandadas de sa lei.
4. Dònna Cunsilleri Comunali, cun sa protzedura cumandada de su regulamentu, tenit su deretu de:
 - a) cumpriri s'initziativa po totus is àutus e is provedimentus postus a suta de sa cumpetèntzia deliberativa de su Cunsillu;
 - b) presentai a s'esàmini de su Cunsillu pediduras, arrexonus, dimandas e propònnidas de aconciaduras;
 - c) amostai in sa sedi de su Cunsillu comunicatzionis e arregumandatzzionis e apariciai Òrdinis de sa Dii.
5. Dònna Cunsilleri Comunali, cun is maneras scioberadas de su regulamentu, tenit su deretu de:
 - a) scrucullai is Dirigentis po cussu chi pertocat a su traballu de gestioni afillau a issus;
 - b) arriciri de is ufizius de su Comune, de is aziendas e de is entis dipendentis de cussu, totus is noas e is informatzionis profetosas po sa cumpridura de su mandau cosa sua;
 - c) arriciri de su Diretori Generali e/o de is Dirigentis de is setoris e de su caminu de is aziendas o de is entis dipendentis de su Comune, còpias de àutus e documentus chi si amostant arrechèdius po sa cumpridura de su mandau cosa sua, in esentzioni de gastu.
6. Su Cunsilleri tenit su cumandu de chistiri su segretu apitzus de is noas e de is àutus arricius, in is acontèssius prevèdius beni crarus de sa lei.
7. Su Cunsilleri chi po arresonis personalis, professionalis o de atra natura, tèngiat s'interessu in una deliberatzioni, o puru candu custa imbòrdighit sogetus apresiaus a issu aintru de su de cuàturu gradu de parentela, si ndi depit andai de s'acorrada po su tempus de s'arrexonu e de sa votatzioni apitzus de sa delibera e totu, pidendi chi sa asèntzia cosa sua bèngiat posta in su verbali. Su regulamentu scioberat is acontèssius aundi si podit cunsiderai presenti su cunflitu de interessus.
8. Is Cunsilleris chi ant acabau sa càrriga po mori de sa sciusciadura de su Cunsillu s'ghint a fai is incàrrigus de aforas chi ddi pertocant, finsas a sa nòmina de cussus chi ddus depint arremprasai.
9. Is Cunsilleris chi no pigant parti a una sessione costumada intrea, chena arresonis giustificadas, funt decraus decadèssius. Sa Decadèssida est pronunziada de su Cunsillu Comunali, de ufiziu o a pustis de sa pedidurqa de unu calisisiat eligidori de su Comune, passau su trèmini de dèxi diis de sa notificatzioni de sa propònnida de decadèssida a cussu imbordigau.

Art. 40 Indennidadi

1. Is Cunsilleris Comunalis tenint su deretu de arriciri unu getoni de presèntzia po sa partecipatzioni a is setziadas de su Cunsillu Comunali e de is Cumissionis. Dònna Cunsilleri podit pediri sa mudàntzia de su getoni de presèntzia in indennidadi de funtzioni arrespetendi cussu cumandau in s'art. 82 comma 4, de su D. Lgs. 267/2000. Custu scioberu depit èssiri impreau dònna annu in is primas cuindixi diis de su mesi de donniasanti.

2. Su Regulamentu apòsitu de su Cunsillu Comunali previdit is maneras de cumpridura de is detrazzioni de is indennidadis numenadas in su comma 1, in acotèssiu de ausèntzia no giustificada de is setziadas de is òrganus collegialis.

Art. 41 Arremprasamentu e suplidura de is Cunsilleris Comunalis e Circoscritzionali

1. In su Cunsillu Comunali e me is Cunsillus Circoscritzionali su sègiu chi in su petantis de cuàturu annus aturit sbuidu po calisiat arresoni, puru si est lòmpia apustis, est donau a su candidau chi in cussa lista e totu sighit deretu a pustis a s'ùrtimu elìgiu.

2. In acotèssiu de suspendidura de unu Cunsilleri impreada cunforma a s'art. 59 de su D. Lgs. 267/2000, su Cunsillu, in sa prima acorrada apustis e sa notifica de su provedimentu de suspendidura sighit a fai sa arremprasadura interina afillendi sa suplèntzia po sa cumpridura de is funtzionis de Cunsilleri a su candidau de sa matessi lista chi at arriciu, a pustis de cussu elìgiu, su nùmeru de votus prus mannu. Sa suplèntzia s'acabat cun s'acabu de sa suspendidura. Casumai bèngiat sa decadèssida, si sighit cun sa surrogatzioni a norma de su comma de inanntis.

Art. 42 Funtzionis organizadoras

1. Su Cunsillu Comunali scioberat in unu Regulamentu de aintru apòsitu, chi si depit aprovai e mudai a majoria assoluta de is Cunsilleris assignaus a su Comunu, sa organizazioni e su funtzionamentu cosa insoru.

2. Su Regulamentu cuncordat intre is atras cosas:

- a) is poderius e is atributzionis de sa Presidèntzia de su Cunsillu Comunali;
- b) is maneras atruessu is calis spratziri servìtzius, trastus, risorsas finantziàrias - no prus pagu de su 0,7% de is gastus currentis de su balanzu comunali chi pertocat a s'esercìtziu finantziàriude s'annu passau - personali, indennidadis e struturas apòsitas po su funtzionamentu de su Cunsillu;
- c) sa istituzioni de is Capigruppo e de sa Cunferèntzia de is Capigruppo;
- d) is maneras de formulatzioni de s'òrdini de sa dii;
- e) is stremus de tzerriada de is sessionis, is proceduras e is trèminis de entrega de is avisus;
- f) is bisuras e is maneras de chisitonu de is propònnidas e de is emendamentus eventualis;
- g) is maneras e bisuras de votatzioni, de numenada de is scruculladoris, su quorum funtzionali astènnius e assentis;
- h) is maneras de is documentatzioni e de sa verbalizatzioni;

- i) is trèminis e is maneras po su depòsitu de is àutus de su Cunsillu;
- l) su deretu de iniziativa deliberativa e scruculladora de is Cunsilleris Comunalis a solus e sa formulatzioni de is preguntas, interpellantzas e motzioni;
- m) is maneras de presentatzioni de sa motzioni de scunfiantza;
- n) is maneras de presentatzioni e sceda de preguntas, motzioni, òrdinis de sa dii e istantzas bia a is Cunsilleris a su Sìndigu e a is Assessoris.

Art. 43 Is Trumas cunsillaris e sa Cunferèntzia de is Capigruppo

1. Is Cunsilleris elìgius in sa matessi lista frumant una Truma cunsillari. In acontèssiu aundi una lista siat stètiu elìgiu unu Cunsilleri e bia, a custu funt arreconnotas de dònna manera sa rapresentàntzia e is mandus chi tocant a una Truma Cunsillari. Est possìbili apariciai una Truma amesturada; su regulamentu de su Cunsillu Comunali ndi cuncordat is maneras de formatzioni.

2. Dònna Truma narat a su Cunsilleri Bèciu e a su Sìndigu su nòmini de su Capogruppo aintru de sa dii de ainnantis de sa prima acorrada de su Cunsillu apena elìgiu. Si no acontessit custa comunicatzioni benit cunsiderau Capogruppo su Cunsilleri prus votau in sa truma candidau a su Cunsillu Comunali.

3. Sa Cunferèntzia de is Capigruppo est s'òrganu consultivu de su Presidenti de su Cunsillu Comunali; agiudat po sa programatzioni de is acorradas e a assegurai sa cumpridura de is traballus de su Cunsillu in sa manera mellus, is setziadas cosa sua funt pùblicas.

4. Su Regulamentu cuncordat is atras cumpetèntzias de sa Cunferèntzia de is Capigruppo, is arrègulas po su funtzionamentu cosa sua e is relatas cun su Presidenti de su Cunsillu, chi dda presiedit, is Cumissionis cunsillaris permanentis.

5. Est arreconnota a is Trumas Cunsillaris sa frunidura de is mesus, de is aposentus e de is trastus chi serbint po su funtzionamentu cosa sua. Su Regulamentu de su Cunsillu Comunali ndi scioberat is maneras.

6. In prus est arreconnota, cun is maneras cumandadas de su Regulamentu de su Cunsillu Comunali, sa autonomia finantzària de is Trumas Cunsillaris.

Art. 44 Dèpiris de is Cunsilleris

1. Is Cunsilleris comunalis tenint su deretu-dèpiru de pigai parti a is setziadas de su Cunsillu Comunali e de pigai parti a is traballus de is Cumissionis cunsillaris permanentis aundi funt imbordigaus.

2. Cun sa tarea de ponni a craru sa situatzioni de s'asienda de is Aministradoris Comunalis, is Cunsilleris tenint su cumandu de dda decrarai dònna annu e po su tempus intreu de su mandau cosa sua, sighendi cussu prevìdiu de su Regulamentu Cunsillari apitzus de is arrègulas de cumpridura de sa lei 441/82.

3. Is Cunsilleris ant a depi decrarai a su cumintzu de su mandau cosa insoru, aintru de 30 dis de su trèmini de sa campagna eletoralis, is gastus eletoralis tentus, siat cumentis candidaus e siat cumentis lista.

Art. 45 Dimitidura de sa càrriga de Cunsilleri Comunali

1. Is dimitiduras de sa càrriga de Cunsilleri, entregadas a su cunsillu cosa sua, depint èssiri arricias deretu in su protocollu de s'enti in su òrdini temporali de presentatzioni. Cussas no si podint pinnigai, no serbit chi ddoi siat sa pigada de àutu e funt bàlidas deretu. Su Cunsillu, aintru e no apustis de dexi diis, depit sighiri ainnantis arremprasendi is Cunsilleris dimitidoris, cun deliberatzionis scongiuntadas, sighendi s'òrdini de presentada de is dimitiduras cumentis bessit a foras de su protocollu. No si fait s'arremprasu candu, si ddoi funt is cunditzionis, si depat sighiri ainnantis cun sa sciusciada de su Cunsillu a norma de lei.

46 Arrègulas generalis apitzus de sa operatividadì e apitzus de s'arrolu funtzionali de su Cunsillu Comunali

1. Su Cunsillu Comunali cuncordat sa funtzioni cosa sua atruessu de una strutura operativa chi at a èssiri aintru de su Regulamentu de su Cunsillu Comunali.

Art. 47 Primu acorru de su Cunsillu Comunali

1. Sa prima setziada de su Cunsillu Comunali est tzerriada de su Sìndigu, aintru de su trèmini perentòriu de dexi diis de sa proclamatzioni e si pòmpiat aintru de dexi diis de sa tzerriada. In acontèssiu chi no bèngiat postu menti a su cumandu de tzerriada, providit de manera arremprasadora su Prefetu.

2. Custa setziada si fait asuta de sa presidèntzia de su Cunsilleri Bèciu e cumprit a custus cumandus:

- cunfrima de is elìgius e arremprasus eventualis;
- giuramentu de su Sìndigu;
- eligidura de su presidenti e de duus Vice-Presidentis de su Cunsillu.

Sa setziada sighit asuta de sa presidèntzia de su Presidenti de su Cunsillu Comunali po is cumpriduras chi sighint:

- istitutzioni de sa Cunferèntzia de is Capigruppo Cunsillaris;
- comunicatzioni de su Sìndigu apitzus de sa nòmina de sa giunta e de su Vicesìndigu e propònnida de is inditaduras generalis de guvernu, chi su Cunsillu chistionat e deliberat.

3. Casumai su Cunsilleri Bèciu siat ausenti o no bollat pigai parti a s'acorru, sa presidèntzia dda pigat su Cunsilleri chi tenit sa posidura deretu a pustis, a foras de su Sìndigu neo-elìgiu e de is candidaus a sa càrriga de Sìndigu scioberaus cumentis Cunsilleris.

Art. 48 Cunsilleri Bèciu

1. Est Cunsilleri Bèciu su Cunsilleri elìgiu cun su nùmeru màssimu de is votus de preferèntzia cun prus cussus de sa lista, a foras de su Sìndigu neo elìgiu e de is candidaus a sa càrriga de Sìndigu, proclamaus Cunsilleris Comunalis. In acontèssiu de paridadi bincit su prus bèciu de edadi.

Art. 49 Iniziativa de is propònnidas

1. S'ìnziativa de is propònnidas de àutus e provedimentus de cumpetèntzia de su Cunsillu Comunali tocat a su Sìndigu, a sa Giunta, a su Presidenti de su Cunsillu Comunali e a is Cumissionis
2. Is maneras po sa presentada, sa istrutòria e s'arrexonu apitzus de is propònnidas de su Presidenti de su Cunsillu Comunali, de is Cunsilleris Comunalis e de is Cumissionis permanentis funt scioberadas de su regulamentu de su Cunsillu Comunali.

Art. 50 Arrègulas generalis de funtzionamentu

1. Is arrègulas generalis de funtzionamentu de su Cunsillu Comunali funt scioberadas de su regulamentu cosa sua, sighendi cussu chi cumandat custu Statutu.
2. Su Cunsillu Comunali est tzerriau e presidiau de su Presidenti de su Cunsillu Comunali in is tràminis e cun is maneras cumandadas de sa lei, de su Statutu e de su regulamentu.
3. Su Cunsillu Comunali est tzerriau de apretu, in is maneras e in is tràminis previdius de su regulamentu, candu custa siat ocasionada de arresonis de importu e chi no si potzant atradai e siat assegurada sa connoscèntzia lestra po parti de is Cunsilleris de is àutus chi pertocant a is allegas iscritas in s'Òrdini de sa Dii.
4. Dònna deliberatzioni de su Cunsillu Comunali si considerat aprovada candu at arriciu sa majoria assoluta de is votantis. Est una cosa differenti po is deliberatzionis po aundi sa lei o custu Statutu ant previdiu a craru, po s'aprovatzioni, majorias spetzialis de votantis.
5. Is votatzionis funt fatas, de norma, cun votu craru. Is votatzionis cun votu cuau serbint po is acotèssius previdius de su regulamentu, aundi funt scioberadas is maneras po totus is votatzionis.
6. Is setziadas de su Cunsillu Comunali funt pùblicas, a foras de is acotèssius aundi, sighendi sa lei e su regulamentu, depint èssiri cuadas.
7. A is setziadas de su Cunsillu Comunali pigat parti su Segretàriu Generali, chi providit a sa apariciadura de su verbali, cumenti puru su Diretori Generali e is Dirigentis imbordigaus apitzu de is allegas iscritas in s'òrdini de sa dii.
8. Po sa balidesa de is acorradas si impreant is arrègulas previdias de sa lei, de su Statutu e de su regulamentu apòsitu de su Cunsillu Comunali.

SU DE CUÀTURU CÀBUDU: SU PRESIDENTI DE SU CUNSILLU COMUNALI

Art. 51 Eligidura de su Presidenti e Vice Presidenti de su Cunsillu Comunali

1. Su Cunsillu Comunali in sa prima setziada, cun votazioni scongiuntadas, eligit cun votu cuau a su Presidenti de su Cunsillu e duus Vice-Presidentis de is calis unu vicàriu, a pustis de sa propònnida de unu sestu de is Cunsilleris imbordigaus.
2. Su Presidenti de su Cunsillu Comunali est elìgiu de sa majoria de is duus tèrtzius de is Cunsilleris imbordigaus in sa sedi de prima votazioni; in sa segunda votazioni si sighit cun su ballotàgiu intre is duus Cunsilleris chi ant arriciu prus votus.
3. Is duus Vice Presidentis benint elìgius donendi una preferèntzia sceti cun votazioni ùnica, sighidora a cussa de su Presidenti de su Cunsillu. Cussu prus votau est proclamau Vicàriu, a paridadi de votus benit proclamau Vicàriu su prus bèciu de edadi.
4. Su Presidenti e is duus Vice-Presidentis de su Cunsillu Comunali intrant in càrriga deretu a pustis de sa proclamazioni de s'eligidura.
5. Sa delìbera cunsillari de eligidura de su Presidenti de su Cunsillu Comunali e de is Vice-Presidentis est cun votu craru deretu esecutiva cunforma a s'art. 134, comma 4, de su D. Lgs. 267/2000.
6. Su Presidenti de su Cunsillu comunali e is Vice-Presidentis aturant in càrriga po totu su tempus de vigèntzia de su Cunsillu e podint èssiri bogaus a pustis de sa iniziativa de unu tèrtziu de is Cunsilleris imbordigaus e a pustis de unu votu craru de scunfiantza de sa majoria de is Cunsilleris imbordigaus.
7. In acontèssiu de prima eligidura de su Presidenti de su Cunsillu, su Cunsilleri Bèciu tzèrriat, a pustis de àiri ascurtau a su Sìndigu, e presiedit su Cunsillu Comunali.
8. In acontèssiu de arrescidurs o ausèntzia chena arresonis bonas de su Presidenti, su Vice Presidenti Vicàriu si pigat is càrrigus de su Presidenti. In acontèssiu de dimitiduras o de bogadura, si sighit a fai s'eligidura de su Presidenti nou aintru de dèxi diis cun is maneras previdias in su comma 2 de custu artìculu; abetendi s'eligidura, su Vice Presidenti vicàriu si pigat puru is tareas de su Presidenti.

Art. 52 Tareas de su Presidenti de su Cunsillu Comunali

1. Su Presidenti de su Cunsillu Comunali rapresentat su Cunsillu Comunali.
2. Issu tenit custus poderius:
 - a) tzèrriat, a pustis de àiri chistionau cun su Sìndigu e sa Cunferèntzia de is Capigruppo, e presedit su Cunsillu Comunali;
 - b) coòrdinat sa atividadi de sa Cunferèntzia de is Capigruppo e de is Cumissionis cunsillaris;
 - c) arricit is decraratzionis de is Cunsilleris po s'assignadura a sa Truma Cunsillari scioberada;
 - d) arricit is dimitiduras de is Cunsilleris Comunalis e proponit sa arremprasadura o sa suspendidura de custus; arricit puru is dimitiduras de su Sìndigu e dònna atra comunicatzioni.
 - e) assegurat sa cumpridura costumada de is atividadis de su Cunsillu, asseguendi ndi is poderius de politzia in is acorradas;

- f) tzèrriat a su Cunsillu Comunali a pustis de sa pedidura de su Sìndigu o de unu cuintu de is Cunsilleris scriendi in s'òrdini de sa Dii is chisitonis preguntadas;
- g) arricit is inditaduras de su Cullègiu de is Revisoris de is Contus a su Cunsillu Comunali;
- h) fait apariciai e averiguat is deliberatzionis de ponni asuta de arrexonu de su Cunsillu Comunali, gosendi de s'agiudu de su Segretàriu Generali e de is Dirigentis, de acòrdiu puru cun su Sìndigu e cun sa Giunta;
- i) arricit sa motzioni de scunfiantza firmada de a su mancu duus cuintus de is Cunsilleris entregaus e ddas fichit in s'òrdini de sa dii, no ainantis de is dexi diis e no prus a tradu de trinta de s'arricida;
- l) arricit is preguntas, is interpellàntzias e is motzionis de ponni a a suta de arrexonu a su Cunsillu;
- m) amparat is mandus de is Cunsilleris Comunalis e assegurat sa cumprdiura prena de is funtzionis cosa in soru;
- n) firmat is àutus e is deliberatzionis de su Cunsillu Comunali impari cun su Segretàriu Generali.

3. Apariciat, de acòrdiu cun is Capigruppo, initziativas de importu mannu chi punnant a promovi s'arrolu de su Cunsillu Comunali.

4. Is indennidadis de entregai a su Presidenti de su Cunsillu Comunali e a is Vice Presidentis funt cumandadas de sa Lei.

SU DE CINCU CÀBUDU : IS ARTICOLATZIONIS DE SU CUNSILLU COMUNALI

Art. 53 Is Cumissionis cunsillaris

1. Is Cumissionis cunsillaris si spratzint in:

- a) Cumissionis cunsillaris premanentis;
- b) Cunferèntzia de is Capigruppo;
- c) Cumissionis prevìdias de leis natzionalis o regionalis;
- d) Cumissionis prevìdias de atrus regulamentus comunali;
- e) Cumissionis spetzialis apariciadas cun Deliberatzioni de su Cunsillu Comunali.

2. Is Cumissionis de is puntus a), b), c), d) de su comma 1, tenint cumentis costumami su pròpiu tempus de su Cunsillu Comunali a foras de cumandus diferentis de lei o de Regulamentu.

3. Is cumponentis dimissionàrius depint èssiri arrempraus in sa prima setziada de su Cunsillu Comunali apustis de is dimitiduras.

4. Is dimitiduras no si podint torrai a pinnigai e funt bàlidas deretu.

5. Is cumponentis decadessint candu bessint assentis no giustificaus po tres setziadas in su petantis de s'annu solari.

Art. 54 Cumissionis cunsillaris permanentis

1. Is Cumissionis cunsillaris permanentis funt organismus de aintru de su Cunsillu Comunali e currispondint a is àreas de interbènnida de is Setoris de sa Aministratzioni.

2. Is Cumissionis cunsillaris permanentis funt furmadas de Cunsilleris comunali chi rapresentant, cun scioberu proportzionali, totus is Trumas impari.

3. Su regulamentu de su Cunsillu Comunali detèrminat nùmeru, maneras, funtzionis e poderius de is Cumissionis; arrègulat sa presèntzia de is tzitadinus espertus; ndi cuncordat s'organizazioni e assegurat in is maneras mellus sa pubblizidadi de is traballus e de is àutus.

Art. 55 Cumposidura e tareas de is Cumissionis cunsillaris permanentis

1. Dònna Cunsilleri depit fai parti de duus Cumissionis Permanentis e de no prus de tres. Su Sìndigu, su Presidenti de su Cunsillu no faint parti de is Cumissionis Permanentis.

2. Is Cumissionis cunsillaris permanentis tenint su pròpiu tempus de su Cunsillu Comunali.

3. Est permìtiu a is Trumas Cunsillaris arremprasai is rapresentantis cosa insoru pighendi àutu po parti de su Cunsillu Comunali.

4. Is Cumissionis cunsillaris permanentis, in su sìtiu de is matèrias de cumpetèntzia cosa su, tenint su deretu de arriciri po parti de sa Giunta Comunali, de is Dirigentis, de is ufìtzios e servìtzios, de is entis e aziendas dipendentis de su Comunu noas, informatzionis, datus, àutus, auditzionis de genti, puru po is tareas de càstiu bia a sa cumpridura de is deliberatzionis cunsillaris, bia a s'Aministratzioni Comunali, bia a sa gestioni de su balanzu e de s'azienda comunali. No podit èssiri postu cuntra de is pediduras de is Cumissionis su segretu de ufìtziu.

5. Su Sìndigu, is Assessoris e is Capigruppo podint pigai parti a is traballus de is Cumissionis permanentis, chene deretu de votai.

6. A is Cumissionis cunsillaris permanentis no podint èssiri donaus poderius deliberadoris.

7. Is Cumissionis podint apariciari su testu de provedimentus, de genia regulamentari puru.

Art. 56 Sa Cunferèntzia de is Capigruppo

1. Sa Cunferèntzia de is Capigruppo est tzerriada e presidiada de su Presidenti de su Cunsillu o de unu Vice cosa sua e spratzinat parris e propònnidas apitzus de:

- a) su calendàriu de is traballus de su Cunsillu Comunali e sa apariciadura de is òrdinis de sa dii relativus;
- b) is pediduras de entregai a su Sìndigu cun sa tarea de assegurai a is Trumas e a is Cunsilleris is mesus e is trastus arrechèdius po su funtzionamentu insoru e a sa cumpridura de su mandau insoru;
- c) sa programatzioni trimestrali de is traballus de su Cunsillu e de is Cumissionis cunsillaris permanentis;

2. Sa Cunferèntzia de is Capigruppo depit èssiri tzerriada aintru de cincu diis candu

bèngiat pediu de is Capigruppo chi rapresentint a su mancu unu tèrtziu de is Cunsilleris, cun propònnida sprigada beni.

3. A is acorradas de sa Cunferèntzia de is Capigruppo pigat parti a su Segretàriu Generali o su Vice cosa sua.

4. Su verbali de dònna setziada benit apariciu de su funtzionàriu segretàriu scioberau intre is dipendentis de s'aministratzioni cun àutu de su Segretàriu Generali. Su verbali at a depi tenni unu arresùmini de is interbènnidas, is serradas e is scioberus pigaus. At a èssiri notificau aintru de is cuarantotu oras a pustis a is Capigruppo.

5. Is Capigruppo podint delegai a unu atru Cunsilleri de sa Truma po ddus rapresentai.

Art. 57 Is Cumissionis comunalis prevìdias de sa lei o de su Regulamentu

1. Sa nòmna de is Cumissionis Comunali prevìdias de is disposiduras de lei e de regulamentu chi siant apariciadas po intreu de cumponentis de su Cunsillu Comunali, est fata de su Cunsillu e totu, cun is maneras prevìdias de su Regulamentu.

2. Sa nòmna de is Cumissionis comunalis prevìdias de disposiduras de lei e de regulamentu, aundi sa cumposidura siat differenti de cussa prevìdia de su comma 1, est fatu de su Sìndigu, sighendi a is inditadura pedias de issu e totu bia a su Cunsillu Comunali e a is entis, assòtzius e atrus sugetus chi, sighendi is disposiduras giai numenadas, depint èssiri rapresentaus in cussas e totu. In is acontèssius chisu scioberu de is componentis tochtit deretu a s'Aministratzioni Comunali, custa e totu benit fata de su Sìndigu intre genti chi portant totus is requisitus de cumpatibilidadi, idoenidadi e cumpetèntzia a sa cumpridura de cussu incàrrigu.

3. In is nòminas de cumpetèntzia de su Cunsillu Comunali o de su Sìndigu depint èssiri promòvia is Pari Oportunidades.

4. Est apariciada sa Cumissioni de Garantzia a amparu de is deretus de partecipazioni de is Minorias Cunsillaris. Su regulamentus de su Cunsillu Comunali scioberat atributzionis e maneras de eligidura.

Art. 58 Is Cumissionis spetzialis

1. Su Cunsillu Comunali podit nominai aintru de issu e totu Cumissionis spetzialis po su stùdiu, sa valutatzioni e sa cuncordadura de intebènnidas, progetus e pianus de importu mannu.

2. A pustis de sa propònnida de su Presidenti de su Cunsillu Comunali e sighendi s'istantza firmada de a su mancu unu tèrtziu de is Cunsilleris, su Cunsillu Comunali cunforma a s'art. 44, comma 2, de su D. Lgs. 267/2000 e sighendi cussu prevìdiu de su regulamentu podit apariciai aintru suu Cumissionis de scrucullu apitzus de is fainas de sa Aministratzioni. De custas faint parti is rapresentantis de totus is Trumas.

3. Su provedimentu de nòmna depit acrarai su sìtiu de is acramentus e is trèminis de serrada. Sa Cumissioni tenit su cumandu de relatai totu a su Cunsillu.

Art. 59 Struturas de apoderamentu a su Cunsillu e a is Cumissionis

Cunsillaris

1. Cun sa tarea de permiti s'impriu mellus de is funtzionis chi tocant a su Cunsillu, is Cumissionis cunsillaris gosant de sa cullaboratzioni de funtzionàrius e impreaus postus asuta de sa responsabilitadi de su Dirigenti de su setori.
2. Is Cumissionis podint puru impreai s'agiudu de peritus, consulentis e tènnicus puru a foras de s'Aministratzioni.
3. Po su funtzionamentu e s'atividadi de is Cumissionis cunsillaris benit iscritu in su balanzu unu tanti apòsitu chi benit carculau dònna annu de su Cunsillu candu funti aproveni su balanzu de prevididura.

SU DE SES CÀBUDU: SA GIUNTA COMUNALI

Art. 60 Cumposidura de sa Giunta

1. Sa Giunta comunali est numenada de su Sìndigu, chi dda tzèrriat e dda presiedit. Au nùmeru de is Assessoris chi dda faint est scioberau cunforma a s'art. 47, comma 2, de su D. Lgs. 267/2000, in su nùmeru màssimu de dexi.
2. In mesu a is Assessoris unu est numenadu Vice-Sìndigu cun tareas de suplèntzia in acotèssiu de arresciduras o de ausèntzia de su Sìndigu. In acotèssiu de ausèntzia de su Vice-Sìndigu is tareas funt fatas de s'Assessori prus bèciu de edadi.
3. Su Sìndigu podit scioberai is Assessoris puru in mesu a genti de aforas de is eligius in su Cunsillu Comunali, bastit chi custas, in prus de currispundi a recuisitus de cumpetèntzia e esperièntzia tènnicu-aministrativa scioberaus de su Sìndigu e totu, tèngiant is recuisitus de eligibilitadi e de cumpatibilitadi a sa càrriga de Cunsilleri comunali. In custu scioberu su Sìndigu promovit is Pari Oportunidadi.
4. Su Sìndigu podit bogai unu o prus Assessoris donendi-ndi una comunicatzioni arrexonada a su Cunsillu

Art. 61 Arrolu e cumpetèntzias generalis

1. Sa Giunta comunali est issa puru unu òrganu esecutivu de cullaboratzioni de su Sìndigu po sa atividadi de su Comune. Cunforma cun s'indirizzu politicu-aministrativu ocasionau de su Cunsillu fait su traballu de iniziativa de amministratzioni, de promovidura e de alliòngiu cun is òrgansu de partecipazioni. Cumprit totus is àutus de amministratzioni chi po lei e po custu Statutu no siant resguardaus po su Cunsillu Comunali, a su Sìndigu, a su Diretori Generali, a su Segretàriu Generalii e a is Dirigentis.
2. Sa Giunta cumprit, in prus, totus is àutus de gestioni a cuntènniu generali chi no tocant a is Dirigentis e cussu chi, po sa natura cosa insoru, depint èssiri arricius de s'òrganu collegiali.

3. Proponit a su Cunsillu is Regulamentus prevìdius de is leis e de custu Statutu.
4. Fait scioberus in su sìtiu de sa disponibilitadi amministrativa, cun s'amosta de is tareas e s'arreconoscimentu de is prioridadis.
5. Aprovat is progetus, is programas esecutivus e totus is scioberus chi ocasionint impìnnius de gastu bia a is stantziamentus de balanzu no entregaus a craru a sa cumpetèntzia de su Cunsillu Comunali o chi no pertocant a su Sìndigu o a is Dirigentis.
6. Podit cuncordai e aprovai conventzionis e atrus àutus de cullaboratzioni cun sugetus pùblicus e privaus, chi pertocat a obras, servìtzius, atividadis amministrativas, cumentis puru sa parti urbanistica, a foras de is cumpetèntzias cunsillaris.
7. Chistionat dònna ses mesis cun su Cunsillu apitzus de sa atividadi cosa sua cun una relata apòsita.
8. Dònna ses mesis est prevìdia una setziada de su Cunsillu Comunali dedicada a su cunfrontu in àula intre Cunsilleris, Assessoris e Sìndigu, chi pertocat a s'atividadi de sa Giunta. Is maneras de cumpridura de custa setziada funt arrexonadas in su regulamentu de su Cunsillu Comunali.

Art. 62 Esercìtziu de is tareas

1. Sa Giunta comunali cumprit is funtzionis entregadas a sa cumpetèntzia cosa sua de sa lei e de su Statutu de manera collegiali. Po sa balidesa de is acorradas cosa sua est netzessària sa presèntzia de sa mitadi prus unu de is cumponentis cosa sua.
2. Sa Giunta est tzerriada de su Sìndigu chi scioberat sa dii de s'acorrada, s'òrdini de sa dii de is allegas de chistionai e dda presiedit puru.
3. Is Assessoris cumprint, po dèlega de su Sìndigu, funtzionis de impèllida a su funtzionamentu de is servìtzius e de is ufìtzius e a sa cumpridura de is àutus, cumentis puru a is servìtzius de cumpetèntzia statali, in su sìtiu de is àreas de is setoris de atividadi chistionaus in sa dèlega giai numenada.
4. Is dèlegas entregadas a is Assessoris funt scoviadas de su Sìndigu a su Cunsillu Comunali in sa prima acorrada. Is mudàntzias o sa bogadura de is dèlegas benit scoviada a su Cunsillu po parti de su Sìndigu in cussu trèmini e totu.

Art. 63 Organizatzioni

1. Sa Giunta est responsàbili ainnantis de su Cunsillu e cumprit is atributzionis cosas sua de manera collegiali, aforas de cussas de aminsitrazzioni costumada entregadas de su Sìndigu bia a is cumponentis a solus.
2. Is Assessoris funt imbordigaus a in medas nais de sa Amministratzioni comunali e torrante sceda impari de is àutus de is Assessoraus insoru.
3. Sa Giunta deliberat a majoria de is presentis. in acontèssiu de paridadi, bincit su votu de su Sìndigu.
4. A su Sìndigu e a is Assessoris est donada una indennidadi mensili scioberada de is

disposiduras vigentis.

Art. 64 Inelegibilitadi e incumpatibilitadi a sa càrriga de Sìndigu e Assessori

1. Is arresonis de inelegibilitadi e incumpatibilitadi a sa càrriga de Sìndigu e Assessori funt scioberadas de sa lei.

2. Sa càrriga de Assessori no est cumpatibili cun sa càrriga de Cunsilleri Comunali. Casumai unu Cunsilleri Comunali si pighit sa càrriga de Assessori in sa Giunta chi ddi pertocat, acabat de èssiri Cunsilleri e dd'arremprasad su primu de cussus chi ndi tenint deretu.

3. No podint fai parti de sa Giunta su sposu, is ascendentis, is discendentis, is familiaris e cussus de intradura finsas a su de tres gradu de su Sìndigu. Cussus e totu no podint èssiri numenaus nimancu cumentis rapresentantis de su Comunu in aziendas, entis e istituzionis dipendentis de su Comunu.

Art. 65 Tempus in càrriga e acabu

1. Su Sìndigu aturat in càrriga finsas a s'eligidura de cussu sighidori.

2. In acontèssiu de impedimentu permanenti, bogadura, decadèssida o morti de su Sìndigu, sa Giunta si sciùsciat e si sighet a sciusciai su Cunsillu. Su Cunsillu e sa Giunta aturant in càrriga finsas a sa eligidura de su cunsillu nou e de su Sìndigu nou. Finsas a is eletzionis numenadas, is funtzionis de su Sìndigu funt tentas de su Vice-Sìndigu.

3. Su Vice-Sìndigu arremprasad a su Sìndigu in acontèssiu de ausèntzia o de impedimentu interinu, cumentis puru in acontèssiu de arrescidura de sa cumpridura de sa funtzioni arricia, cunformaa s'articulu 59 de su D. Lgs. 267/2000.

4. Is dimitiduras de su Sìndigu no si podint prus pinnigai e ocasionant is efetus candu passat su trèmini de binti diis de sa presentada insoru a su Cunsillu.

5. Su sciussiu de su Cunsillu Comunali detèrminat in dònna acontèssiu sa decadèssida de su Sìndigu e de sa Giunta intrea.

Art. 66 Motzioni de scunfiantza

1. Su votu de su Cunsillu Comunali cuntra de una propònnida de su Sìndigu o de sa Giunta no ocasionat is dimitiduras de cussus e totu.

2. Su Sìndigu e sa Giunta cosa sua acabant sa càrriga in acontèssiu de aprovatzioni de una motzioni de scunfiantza votada po apellu numenau de sa majoria prena de is cumentis de su Cunsillu. Sa motzioni de scunfiantza depit èssiri sprigada beni e firmada de a su mancu duus cuintus de is Cunsilleris imbordigaus e benit posta a asuta de arrexonu no ainnantis de dexi diis e no apustis de trinta de sa presentada cosa sua. Si sa motzioni benit aprovada, si sighet ainnantis a sciusciai su Cunsillu e a numenai unu Cumissàriu cunforma a is leis vigentis.

Art. 67 Dimitiduras, acabu e bogadura de is Assessoris

1. Is dimitiduras o s'acabu de s'ufitziu de Assessoris depint èssiri scoviadas de su Sindigu a su Cunsillu Comunali in sa prima acorrada.

Art. 68 Decadèssida de sa càrriga de Assessori

1. Sa decadèssida de sa càrriga de Assessori acontessit po:

- a) averiguadura de una arresoni de inelegibilitadi o de incompatibilitadi;
- b) in is atrus acontèssius prevìdius de sa lei.

Art. 69 Arrègulas generalis de funtzionamentu

1. Is acorradas de sa Giunta comunali no funt pùblicas, a foras de unu scioberu differenti de su Sindigu. A custas nci pigat parti puru su Segretàriu Generali e agiudat a su funtzionàriu scioberau po scriri su verbali.

2. Su Sindigu podit cumandai chi a is acorrus de sa Giunta, in su petantis de su chistionu de allegas particularis, nci siant, cun funtzionis consultivas, Dirigentis, funtzionàrius de su Comunu e consulentis de aforas cumentis puru su Diretori Generali.

3. Podint èssiri cumbidaus a is acorradas de sa Giunta, po èssiri preguntaus apitzus de unas allegas chi pertocant a is funtzionis e incàrrigus o dèlegas insoru, su Presidenti de su Cunsillu, su Cullègiu de is Revisoris de is Contus e is rapresentantis de su Comuu in Entis, Aziendas, Cunsòrtzius.

4. Sa Giunta, impari cun is capigruppo dònna ses mesis si acorrat cun is ufizius de Presidèntzia de is Circostrizioni po s'èsàmini alliongiau de is strobis de su stesiamentu.

5. Is arrègulas generalis de funtzionamentu de sa Giunta funt cuncordads cunforma a sa Lei e a su Statutu, in su regulamentu de s'art. 7 de su D. Lgs. 267/2000 de arriciri aintru de ses mesis de sa aprovazioni de custu Statutu.

SU DE SETI CÀBUDU: DELIBERAZIONIS, ISTRUTÒRIA, PARRIS, DEPÒSITU ÀUTUS

Art. 70 Deliberazionis, parri orgànicus collegialis

1. Is òrganus collegialis deliberant o pigant parris de manera bàlida, cun s'interbènnida de sa mitadi de is componentis imbordigaus e a majoria de is presentis, a foras de majorias spetzialis prevìdias de manera crara de is Leis o de su Statutu.

2. Is deliberazionis o parris funt pigaus de costumàntzia cun votazioni amostada. Si depint pigai de scrucullu cuau is deliberazionis chi pertocant a sa genti, candu bèngiat impreau unu scioberu discretzionali fundau apitzus de s'agradèssida de is calidadis sugetivas de una persona o a pitzus de cosas chi cussu at fatu.

3. Is setziadas de su Cunsillu Comunali funt pùblicas. In s'acontèssiu chi si depant apariciai valutatzionis e agradèssidas po una persona, su Presidenti cumandat su chistionu de cuss'allega in setziada cuada.

Art. 71 Procedimentu giustu

1. Cunforma a s'art. 49 de su D. Lgs. 267/2000, po dònna propònnida de deliberatzioni posta suta de su scioberu de sa Giunta e de su Cunsillu, depit èssiri pediu su parri, cunforma a sa regularidadi tènnia e contàbili e bia, rispetivamente de su responsàbili de su servìtziu e de su responsàbili de ragioneria. Is parris funt fichius aintru de sa deliberatzioni.

Art. 72 Istrutòria, documentatzioni, depòsitu e verbalizatzioni de is propònnidas

1. S'istrutòria, sa documentatzioni de is propònnidas de deliberatzioni, su amagasinamentu de is àutus e sa verbalizatzioni de is setziadas de su Cunsillu e de sa Giunta funt sighias de su Segretàriu Generali cun su càstiu de su Presidenti de su Cunsillu.

2. De totus is àutus deliberadoris de dònna annu at a èssiri tenta sa arregòllida regulari, sighendi su caminu de su tempus.

3. Is verbalis de is chistionus de dònna annu ant a èssiri arregòllius cussus puru sighendi su tempus insoru.

4. Is àutus de deliberatzioni de sa Giunta funt sutascritus de su Sìndigu e de su Segretàriu Generali e cussus de su Cunsillu de su Presidenti de su Cunsillu Comunali e de su Segretàriu Generali.

5. Su Segretàriu Generali no pigat parti a is setziadas candu ddoi funt acontèssius de incompatibilidadi. Intzandus est arremprasau po cussu tempus in su Cunsillu Comunali de unu Cunsilleri numenau de su Presidenti e in Giunta de unu Assessori numenau de su Sìndigu.

SU DE TRES TÌTULU
ISTITUTUS DE PARTECIPATZIONI POPOLARI

SU DE TRES TÌTULU: ISTITUTUS DE PARTECIPATZIONI POPOLARI

PRIMU CÀBUDU: SA PARTECIPATZIONI DE IS TZITADINUS A S'AMINISTRATZIONI COMUNALI

Art. 73 Sa partecipazioni de is tzitadinus a s'aministratzioni

1. Sa partecipazioni de is tzitadinus a s'aministratzioni amostat su cuncursu deretu de sa Comunità a sa cumpridura de is funtzionis de is òrganus comunalis.
2. Is tzitadinus, imperendi si maneras prevìdias de su Statutu e de su regulamentu, agiudant a sa programatzioni de is atividades amministrativas e apitzu de allegas específicas chi tenint unu interessamentu de importu po sa Comunità.

Art. 74 Cunsillu Comunali de is picocus

1. Su Comunu cun sa tarea de favoressi sa partecipazioni de is picocus a sa vida culletiva podit impelli s'eligidura de su Cunsillu Comunali de is picocus.
2. Su Cunsillu Comunali de is picocus tenit sa tarea de deliberai de manera consultiva in custas allegas: política ambientalì, sport, tempus liberu, giogus, relatas cun is assòtzius, cultura e spetàculu, istrutzioni pùblica, agiudu a is giòvunus e a is bècius, relatas cun s'Unicef.
3. Is maneras de eligidura e su funtzionamentu de su Cunsillu Comunali de is picocus funt cuncordadas cun unu regulamentu apòsitu.

Art. 75 Sa partecipazioni de is liberas formas assotziadoras

1. Sa partecipazioni de is tzitadinus a s'aministratzioni de su Comunu est apariciada e valorizada de is òrganus eligidoris comunalis in is maneras prevìdias de su Statutu e de su regulamentu apòsitu.
2. Su Comunu podit promovi sa partecipazioni a s'aministratzioni de assòtzius liberus e organismus de tzitadinus atruessu de is Consultas is calis cumposiduras, funtzionis e tareas funt scioberadas de su Regulamentu.

Art. 76 Sa atividades de partecipazioni de is Consultas

1. Is Consultas podint presentai a su Sindigu propònnidas, istantzas e pediduras a is calis is òrganus de su Comunu torrant sceda in is tempus e in is maneras prevìdias de su regulamentu po sa partecipazioni.
2. Su Sindigu pedit su parri de sa Consulta cumpetenti ainnantis de sa presentazioni in su Cunsillu de àutus de fundòriu chi tènghiant importu mannu bia a is interessus e is

cunditionis de is tzitadinus.

3. Su Sindigu assegurat a is Consultas s'imbiu de una còpia de custu Statutu, de is regulamentu e de is atrus documentus bonus po ativai sa partecipazioni insoru de propònnidas a s'aministrazioni de su Comunu.

Art. 77 Relata apitzu de su stadu de sa Comunità

1. Su Cunsillu Comunali portat, a su mancu una borta a s'annu, aintru de su mesi de friàrgiu, una acorrada oberta cun sa partecipazioni de is tzitadinus, aundi su Sindigu amostat su stadu de sa Comunità in is maneras e allegas prus de fundòriu, castiendi a sa situatzioni chi ddoi fiat in is annus passaus.

Art. 78 Sa partecipazioni de is tzitadinus a solus

1. Is istantzas, pediduras e propònnidas amostadas de unu o prus tzitadinus, deretas a impelli interbènnidas po s'amparu mellus de interessus generalis de sa culletividadì, funt postas de su Sindigu a suta de su scrucullu istrutòriu de sa Cumissioni cunsilalri permanenti imbordigada, chi at a sprigai is scioberus cosa sua.

2. Su regulamentu apitzu de sa partecipazioni at a depiri cuncordai is tempus e is maneras de propònnidas, de arrespustsa e dònna atru sentidu, manera e stremu po fai cumpridoris cussus scioberus de is tzitadinus.

SEGUNDU CÀBUDU: SA CONSULTAZIONI DE IS TZITADINUS E IS REFERENDUM

Art. 79 Sa consultazioni de is tzitadinus

1. Su Cunsillu Comunali, po iniziativa cosa sua o a pustis de sa propònnida de su Sindigu, podit deliberai sa consultazioni prebennidora de categorias particularis de tzitadinus, a pitzu de propònnidas chi tèngiant interessu mannu e deretu.

2. Sa consultazioni podit èssiri fata puru aparicendi acorradas de is tzitadinus interessaus, aundi potzant amostai, in is maneras mellus, is pensamentus o propònnidas cosa insoru.

3. Is Cunsillus circoscritzionali podint aparicai, cun is maneras amostadas in su comma 2, sa consultazioni de is tzitadinus de sa Circoscritzioni.

4. Su regulamentu cuncordat is maneras e is trèminis chi pertocant a is consultazioni de custu articulu.

Art. 80 Referendum consultivu

1. Is Eligidoris de su Comunu podint èssiri tzerrius po donai su parri insoru apitzus de programas, pianus, progetus, interbènnidas e dònna atra allega chi pertocat a s'Aministrazioni e a su funtzionamentu de su Comunu, cun su referendum consultivu.

2. Is referendum consultivus funt apariciaus po deliberatzioni de su Cunsillu Comunali, chi frimat su testu de ponni asuta de su càstiu de is eligidoris. Sa deliberatzioni depit èssiri impreada cun su votu favoràbili de is duus tèrtzius de is cunsilleris imbordigaus. Su Sìndigu, bessia cumentu esecutiva sa deliberatzioni, fait cumintzai is stremus prevìdius de su regulamentu.

3. Is referendum consultivus in prus funt apariciaus a pustis de sa pedidura presentada, cun firmas autenticadas in is maneras de lei, de a su mancu su 5 po centu de is eligidoris iscritus in is listas de su Comunu a sa dii de su 1^u de Gennàrgiu de s'annu chi benit presentada sa pedidura. Custas firmas depint èssiri arregòllias in is trinta diis a pustis de sa agradèssida de sa pedidura. Sa pedidura depit tenni su testu de amostai a is eligidoris e benit presentada a su Sìndigu chi, apustis de s'averiguadura po parti de sa Segreteria Generali de sa regularidadadi de cussa e totu, chi si depit fai aintru de trinta diis de sa dii de arricidura, proponit a su Cunsillu su provedimentu chi cumandat su referendum. Casumai castiendi sa averiguadura fata bessat aforas chi su referendum no si podit fai, su Sìndigu entregat sa pedidura e sa relata de sa Segreteria Generali a su Cunsill, chi scioberat de manera definitiva apitzu de custa allega cun su votu de is duus tèrtzius de is Cunsilleris imbordigaus in su Comunu.

4. No podint èssiri ogetu de referendum consultivu custas cosas:

- a) revisioni de su Statutu de su Comunu e de cussus de is aziendas spetzialis;
- b) disciplina de su stadu giurìdicu e de is assuntzionis de su personali, piantas orgànicas de su personali e is mudàntzias alliongiadas;
- c) tributus localis, prètzius de is servìtzius e atrus pagus;
- d) scioberu e nòmina de is rapresentantis.

5. Is referendum funt apariciaus de su Sìndigu, si depint fai aintru de sessanta diis de sa si de esecutividadadi de sa deliberatzioni cunsilari e si faint castiendi is maneras cumandadas de su regulamentu.

6. Su referendum, po tènniri eficatzidadi, at a depi arriciri sa partecipatzioni de su 50 po centu prus unu de is eligidoris iscritus me is listas eletoralis.

7. S'arresultau de su referendum est proclamau e spratzinau de su Sìndigu cun is mesus de comunicatzioni prus profetosus poita totu sa tzitadinàntzia ddu bèngiat a sciri.

8. Is consultatzionis de s'artìculu 79 e is referendum depint tènniri cumentu ogetu allegas de cumpètzentzia locali sceti.

9. Is referendum si faint de costumàntzia in una sola torrada eletorali. Sa votatzioni at a tènniri su tempus de una gerronada e bia.

Art. 81 Referendum proponnidoris e consultivu

1. A foras de cussas allegas chi no podint èssiri ogetu de referendum chi funt scritas in su comma 4 de s'artìculu 80, su Cunsillu Comunali e is tzitadinus podint preguntai po apariciai referendum proponnidoris e consultivus cun is maneras sprigadas in is commas 2, 3, 5, 6, 7 e 9 de s'artìculu 80.

SU DE TRES CÀBUDU: SA CONSULTAZIONI DE IS TZITADINUS A SU PROCEDIMENTU AMINISTRATIVU

Art. 82 Sa partecipazioni de is tzitadinus e procedimentu aministrativu Art. 83 Responsabilitadi de su procedimentu

1. Sa partecipazioni de is interessaus a is procedimentus aministrativus chi pertocant a s'arricidura de is àutus chi cracant apitzu de acontèssius giuridicus sugetivus est assegurau de is normas cumandadas de sa lei 7 de austu 1990 n. 241, de cussas cumpridoras previdias de custu Statutu e de cussas operativas cumandadas de su regulamentu.

Art. 83 Responsabilitadi de su procedimentu

1. Is provedimentus aministrativus spratzinaus de su Comunu depint èssiri arrexonaus.
2. Su responsàbili de su procedimentu est agatau cunforma a sa lei n. 241/90 e mudàntzias e aciuntas sighidoras e assegurat su deretu a sa privacy, po cumpriri is normas de sa Lei 31 de mes'e idas 1996, n. 675 e mudàntzias e aciuntas sighidoras.

SU DE CUÀTURU CÀBUDU: S'ATZIONI POPOLARI

Art. 84 S'atzioni arrempradora

1. S'atzioni popolari entregat a dònna eligidori su poderiu de impelli e atvai is atzionis e is recursus chi tocant a su Comunu, ainnantis de is giurisditzionis aministrativas, in s'acontèssiu chi su Sìndigu no si ativit po s'amparu de unu interessamentu legìtimu de s'Enti.
2. Su Sìndigu, arricia sa noa de s'atzioni cumintzada de su tzitadinu, depit averiguai si ddoi funt arresonis e cunditionis po si pigai deretu s'amparu de s'interessamentu de s'Enti, aintru de is trèminis de Lei.
3. Casumai su Sìndigu scioberit de si pigai deretu s'amparu de is interessus generalis, ndi donat avidu a totus cussus chi ant cumintzau s'atzioni. In s'acontèssiu chi no pensit chi ddoi funt is elementus e is arresonis po impelli su stremu de amparu ddu fait sciri spratzinendi unu àutu arrexonau cosa sua.

SU DE CINCU CÀBUDU: SU DERETU DE INTRADA E DE INFORMATZIONI DE SU TZITADINU

Art. 85 Publitzidadi de is àutus e de is informatzionis e deretu de intrada

1. Totus is àutus de s'Aministratzioni comunali funt pùblicus.
2. Su Comunu podit apariciai servìtzius de informatzioni de is tzitadinus po sa

spratzinadura de is informatziones chi pertocant a datus e noas generalis e a is àutus de fundòriu arricius.

3. Regulamentu apòsitu apariciat, in sedi cumpridora, cussu previdiu in custu artìculu.

4. Su deretu de intrada a is àutus amministrativus est assegurau a totus is tzitadinus, sighendi is maneras cuncordadas de su regulamentu cumpridori de sa lei 7 de austu 1990 n. 241; po custa tarea benit apariciu s'ufitziu apòsitu po s'intrada e sa trasparèntzia de is àutus.

SU DE SES CÀBUDU: S'AMPARADORI TZÌVICU

Art. 86 Istituzioni, arrolu e relatas cun su Cunsillu Comunali

1. Su Amparadori tzìvicu, òrganu apariciu cun custu Statutu, cumprit s'arrolu de garanti de sa imparzialità e de sa sigidura bona de sa Amministratzioni Pùblica Comunali.

2. Su Sìndigu assegurat a s'ufitziu de su Amparadori Tzìvicu una sedi bona e is dotatziones de personali e de cosas strumentalis profetosus po fai funtzionai ben a s'istitutu.

3. S'Amparadori tzìvicu presentat a su Cunsillu Comunali, aintru de su mesi de martzu, sa relata apitzu de sa atividadi fata in s'annu a innantis, sinnalendi is strobis agataus e e aparicendi propònnidas chi bollant amellorai su caminu bonu e sa imparzialità de su stremu amministrativu. Sa relata benit chistionada aintru de su mesi de abrili e posta pùblica.

4. Po allegas de interessu mannu, s'Amparadori Tzìvicu fait sinnaladuras chi su Presidenti de su Cunsillu Comunali fichit in s'òrdini de sa dii de sa prima acorrada de su Cunsillu Comunali.

Art. 87 Recuisitus

1. Si podit candidai a fai is tareas de Amparadori Tzìvicu dònna tzitadinu bividori in su Comunu de a su mancu cuindixi annus, chi apat lòmpiu a su de coranta annu de edadi e no apat passau su de setanta, de esperièntzia giuridicu-amministrativa cumprada e da amostai cun curriculum de alliongiai a sa propònnida, de aundi bessat a foras puru s'icritzioni eventuali a Assòtzius o a currìglius de calisiat genia.

2. No podit èssiri numenrau cumentu Amparadori Tzìvicu cussu chi est in cunditzinis de inelegibilità e de incompatibilità cumandadas de su regulamentu, sighendi is allegas giuridicas generalis chi arrèglant s'eligidura a is incàrrigus comunalis.

3. No si podit pigai s'incàrrigu de Amparadori Tzìvicu cussu chi no entregat una decraratzioni de onori e de imbordigamentu aundi bessat a foras chi no si bolit candidai, in su petantis e/o a sa scadèssida de su mandau, in su Comunu de iscrizioni in is listas eletoralis.

4. S'Amparadori Tzìvicu arruit po is matessi arresonis po is calis si perdit sa calidadi de Cunsilleri o po sa lòmpida de una de is cunditziones de inelegibilità amostadas de su comma 2 o po sa violadura de is arrègulas previdias in su Regulamentu.

Art. 88 Eletzionis e annuddamentu

1. S'Amparadori Tzìvicu est elìgiu de su Cunsillu comunali in setziada pùblica, a scrucullu cuau, castiendi sempri a is candidaduras lòmpias, cun sa majoria de is votus de is duus tèrtzius de is Cunsilleris imbordigaus in su Comunu. Casumai a pustis de sa prima votatzioni s'arresultau siat negativa, sa segunda votatzioni at a acontèssiri in setziada sighidora chi s'at a depi fai aintru de sa de dexi dii e no ainantis de sa de cincù, sempri cun sa majoria de is duus tèrtzius. Si s'arresultau at a èssiri torra negativu is candidaus votaùs perdint s'eletorau passivu. A pustis de s'eligidura at a giurai cun sa fòrmula de s'art. 11 de su D.P.R. 10 de gennàrgiu 1957, n.3.

2. Su Amparadori Tzìvicu est funtzionàriu onoràriu e ufiziali pùblicu.

3. S'Amparadori Tzìvicu aturat in càrriga finsas a su rennoamentu de su Cunsillu Comunali e benit elìgiu in is 60 diis sighidoras a su rennoamentu e totu. Podit èssiri elìgiu una borta sceti.

4. In s'acontèssiu de dimitiduras o vacàntzia de sa càrriga in su petantis de cuàturu annus, su Cunsillu apariciat sa eletzioni noa in sa prima acorrada benidora. Finsas a s'eletzioni, arricidura e cuncàmbiu de is cumpetèntzias e de is poderius, s'Amparadori Tzìvicu dimìtiu aturat in càrriga po su printzìpiu de sa prorogatio chi ddi cunfrimat totus is poderius.

5. S'Amparadori Tzìvicu, a pustis de sa propònnida de 1/3 de is Cunsilleris Comunalis imbordigaus, podit èssiri bogau in is acontèssius previdius de su Regulamentu cun sa majoria de is 4/5 de is Cunsilleris imbordigaus. In custu acontèssiu no si impreat su printzìpiu de sa prorogatio.

Art. 89 Prerogativas e tareas

1. S'Amparadori Tzìvicu cumprit is funtzionis cosa sua cun autonomia prena e indipendèntzia e cun totus is poderius chi cussas depint tenni.

2. S'Amparadori Tzìvicu podit interbenni, a pustis de sa pedidura de is tzitadinus a solus o assotziaus o po iniziativa cosa sua, anca s'Aministratzioni Comunali, is aziendas spetzialis, is istituzionis, is cuncessionàrias de servìtzius, is cunsòrtzius e is sotziedadis chi apariciant servìtzius pùblicos in su s'ituu comunali po averiguai chi is procedimentus amministrativus apant cursu regulari e chi is provedimentus siant spratzinaus de manera currìgia e lestra.

3. S'Amparadori Tzìvicu, po is acramentus de su comma 2, podit tzerriai a su responsàbili de su servìtziu imbordigau aintru de unu trèmini chi scioberat issu e totu, e a ndi pediri documentus, informatzionis, e acramentus chene che si ndi potzant donai dennegus o su segretu de ufiziu. Issu podit scioberai de scrullai impari cun su funtzionàriu imbordigau sa pràtica, aintru de is trèminis cumandaus e podit pediri a custos una relata scritta apitzu de su stadu de su procedimentu o a cosas particularis de cussu.

4. A s'Amparadori Tzìvicu est donada una indennidadi mensili de funtzioni scioberada de su Cunsillu Comunali no prus manna de cussa previdia de sa lei po s'Assessori Comunali.

5. Regulamentu apòsitu at a acrarai is tareas, is funtzionis, is relatas cun is òrganus

comunalis e is maneras de propònnidas de is candidaduras po s'incàrrigu de Amparadori Tzìvicu. Sa regulamentatzioni at a depi èssiri deliberada aintru de duus mesis de sa aprovatzioni de custu Statutu.

6. In sa fàsia de prima cumpridura, s'Amparadori Tzìvicu at a èssiri elìgiu aintru de trinta diis de s'aprovatzioni definitiva de su regulamentu e at a aturai in càrriga finsas a su rennoamentu de su Cunsillu Comunali.

**SU DE CUÀTURU TÌTULU:
CIRCOSCRITZIONIS DE DETZENTRAMENTU COMUNALI**

SU DE CUÀTURU TÌTULU: CIRCOSCRITZIONIS DE DETZENTRAMENTU COMUNALI

Art. 90 Articolatzioni territoriali

1. Su Comunu, cun sa tarea de assegurai sa cumpridura de is funtziois in is sìtius territorialis aconciaus a s'apariciadura ratzionali in soru, cuncordat po intreu o po una parti a su territòriu cosa sua in Circoscritzionis de detzentramentu.
2. Aintru de noranta diis de s'intrada in vigori de su Statutu, su Cunsillu Comunali s'ghit ainnantis mudendi o cunfrimendi sa spratzidura de su territòriu comunali in Circoscritzionis.
3. Su nùmeru e is làcanas de is Circoscritzionis funt mudaus cun deliberatzioni de su Cunsillu Comunali.
4. S'ordinamentu territoriali nou de is Circoscritzionis, cuncordau s'ghendi cussu chi est prevèdiu de su comma 2, at a intrai in vigori cun sa prima eligidura de is Cunsillus circoscritzionalis s'ghidora a sa arricidura de custu Statutu, aturendi perlongau finsas a cussu tempus s'assentu chi ddoi est imoi.

Art. 91 Òrganus de sa Circoscritzioni

1. Funt òrganus de sa Circoscritzioni su Cunsillu Circoscritzionalis e su Presidenti.
2. Su Cunsillu circoscritzionalis rapresentat is apretus de sa popolatzioni de sa Circoscritzioni in su sìtiu de sa unidadi de su Comunu. Benit eligiu s'ghendi is arrègulas cumandadas de sa lei cun su sistema proportzionalis tzerriau Dont, cunforma a s'art. 17, comma 4, de su D. Lgs. 267/2000.
3. Su Cunsillu circoscritzionalis eligit aintru suu a su Presidenti e a su Vicepresidenti.
4. Su Presidenti rapresentat a su Cunsillu circoscritzionalis e cumprit is funtzionis cumandadas de su regulamentu, impari a cussas chi ddi benint delegadas de su Sìndigu puru cumentis Ufizziali de Governu.
5. Is Cunsillus circoscritzionalis aturant in càrriga po unu tempus chi currispundit a cussu de su Cunsillu Comunali, e apustis de sa tzerriada de is comitzius eletoralis e finsas a sa eletzioni de is Cunsillus nous, ant a fai sceti is àutus apretaus e chi no si podint perlongai.
6. Sa sciuciada o s'acabu antetzipau de su Cunsillu Comunali ocasionant su rennoament puru de is Cunsillus circoscritzionalis. Si impreant, averiguendisì custas cunditziunis, is disposidura de su comma 5.
7. De su tempus aundi ant a èssiri entregaus a is Circoscritzionis is poderius deliberadoris e is funtzionis delegadas a su Presidenti de circoscritzioni est dèpida una indennidadi mensili aici cumentis est prevèdiu in su art. 82, comma 1, de su D. Lgs. 267/2000.
8. De candu ant a èssiri entregadas a is Circoscritzionis is poderius deliberadoris e is funtzionis delegadas a is Cunsilleris de circoscritzioni est entregada una indennidadi de presèntzia, po sa partecipazioni efetiva a is acorradas de is Cunsillus circoscritzionalis,

aici cumentu prevèdiu de s'art. 82, comma 2, de su D. Lgs. 267/2000.

Art. 92 Cumposidura e funtzionamentu de is Cunsillus Circoscritzionali

1. Sa cumposidura e su funtzionamentu de is Cunsillus circoscritzionali funt cuncordaus, po cussu chi no est prevèdiu de su Statutu, de su regulamentu apòsitu.
2. Su regulamentu in vigori at a depi èssiri mudau e adelantau aintru de duss mesis de s'aprovazioni de custu Statutu.

Art. 93 Tareas cosa sua

1. Is Circoscritzioni funt organismus de partecipazioni, de consultazioni, de gestioni de is servìtzios de fundòriu e de cumpridura de is funtzionis delegadas de su Comune.
2. Su Cunsillu circoscritzionali apariciat, sighendi is normas de custu Statutu e de su regulamentu, sa partecipazioni de is tzitadinus de sa Circoscritzioni a sa amministratzioni de su Comune, alluendi-ndi s'iniziativa chi punnat a promovì interbennidas po amellorai s'amparu de is interessus de totus. Cumprit, cumentu rapresentàntzia elìgia de sa Circoscritzioni, sa partecipazioni a su traballu de su Comune cun iniciativas e propònnidas cosa sua.
3. Su Cunsillu circoscritzionali:
 - a) amostat pari e apariciat propònnidas apitzu de àutus e allegas prevèdias de su regulamentu;
 - b) fait consultazioni de is tzitadinus e de is assòtzios lìberus cosa insoru apitzu de allegas de cumpetèntzia de sa Circoscritzioni
 - c) agiudat po sa arrennèscida mellus, in su s'ìtiu de sa Circoscritzioni, de is consultazioni e de is referendum consultivus chi pertocant a totus is tzitadinus de su Comune

Art. 94 Tareas delegadas

1. A is Cunsillus circoscritzionali funt entregadas is funtzionis delegadas in is allegas scioberadas de su Regulamentu.
2. Su Cunsillu Comunali, dònna annu e cunforma a s'aprovazioni de su Balanzu de prevididura, scioberat su tanti de entregai a dònna circoscritzioni puru castiendi a is programmas adelantaus aintru de is funtzionis numenadas in su comma 1.
3. Totus is àutus chi pertocant a sa programatzioni funt imbiaus a is Circoscritzioni po sa connoscèntzia chi ddi pertocat.

Art. 95 Organizazioni de is atividades

1. In su s'ìtiu de s'apariciadura intrea de su Comune funt cumandadas is fruniduras de personali entregadas a is Circoscritzioni de detzamentu.
2. Sa responsabilitadi apariciadora de s'ufitziu circoscritzionali est entregada a unu impreau comunali, chi fait su Segretàriu de sa Circoscritzioni. S'entrega e sa bogadura

de s'incàrrigu funt cuncordaus de su Sìndigu, ascurtau su parri de su Cunsillu circoscritzionali.

3. Su regulamentu cuncordat:

- a) s'apariciadura e su funtzionamentu de s'ufitziu circoscritzionali;
- b) is tareas e is responsabilidadi de su Segretàriu de sa Circoscritzioni;
- c) sa gestioni contàbili de is fundus de economau entregaus a sa Circoscritzioni po su funtzionamentu de s'ufitziu.

Art. 96 Deliberatzioni de is Cunsillus de Circoscritzioni

1. Is deliberatzionis de is Cunsillus de Circoscritzioni benint a èssiri esecutivas a pustis de sa de cuindixi dii apustis de sa publicatzioni insoru cun s'apicadura in s'Albu Pretòriu de su Comunu a foras de sa suspendidura o s'annullamentu cun provedimentu arrexonau, po parti de sa Giunta Comunali, de imbiai a su Presidenti ainnantis de sa scadèssida de su tràmini de esecutividadi.

2. Totus is deliberatzionis bandant imbiadas si no si bolint biri annulladas, aintru de cincu diis de sa publicatzioni a s'Albu Pretòriu, imperendi is missus comunalis, a is Capigruppo de su Cunsillu Comunali, a su Sìndigu, a su Presidenti de su Cunsillu, a is cumponentis de sa Giunta Comunali, a sa Segreteria de su Comunu e a is Presidentis de is Circoscritzionis.

Art. 97 Sciusciadura de su Cunsillu de Circoscritzioni

1. Su Cunsillu de Circoscritzioni podit èssiri sciusciau candu, mancari sa intima sprigada, amostada cun deliberatzioni de su Cunsillu Comunali, arreppitit is violaduras de sa lei, de custu Statutu o de is regulamentus; in prus candu issu siat in sa impossibilitadi de funtzionai po s'eligidura fartada de su Presidenti o po is dimitiduras o po sa decadèssida de a su mancu sa mitadi de is Cunsilleris.

2. Su sciùsciu est decrarau de su Cunsillu Comunali, cun sa majoria de is duus tèrtzius de is Cunsilleris entregaus.

3. Su Cunsillu comunali ponit, cunforma a sa sciusciadura de su Cunsillu de Circoscritzioni, sa dii de is eligiduras po su rennoamentu de s'organismu.

**SU DE CINCU TÌTULU:
ORDINAMENTU DE IS UFÌTZIUS
E DE SU PERSONALI**

SU DE CINQU TÌTULU: ORDINAMENTU DE IS UFÌTZIUS E DE SU PERSONALI

PRIMU CÀBUDU: ORGANIZATZIONI DE IS UFÌTZIUS E DE SU TRABALLU

Art. 98 Organizazioni de is ufìtzius e de is servìtzius

1. Is ufìtzius e is servìtzius comunalis funt aparicius sighendi is critèrius de autonomia, trasparèntzia e atùliu e critèrius de funtzionalidadi, economitzidadi de gestioni e indullidura de sa strutura.
2. In sa cumpridura de custus critèrius e allegas, is Dirigentis responsàbilis, ghiaus de su Segretàriu e/o de su Diretori Generali impellint sa simprificadura màssima de is procedimentus e cuncordant s'imbordigamentu de is addonus cun critèrius de ratzionalidadi econòmica.
3. Su Regulamentu apitzus de s'ordinamentu de is ufìtzius e de is servìtzius est apariciu sighendi unu schema apariciadori bonu de si cunformai sempri a is programas aprovaus de su Cunsillu Comunali e a is fainas chi su Sìndigu , ascurtada sa Giunta, at scioberau.
4. Su regulamentu cumandat is arrègulas apariciadoras, cuncordat s'organigrama de is cumpriduras de personali, definit s'articulatzioni de sa strutura, sighendi is allegas cumandadas apitzu.
5. Cunforma a is tareas apariciadas cun is àutus de programatzioni finantziària, su Sìndigu, apustis de airi ascurtau a sa Giunta Comunali, apustis de sa dimanda de sa Cunferèntzia de is Dirigentis, cumandat aintru de su mesi de donniasanti su pianu de traballu e cussu de sa movidura de aintru, cunforma a s'apretu de aconciai totus is struturas a solas a is programas e a is progetus traballadoris de cumpriri in s'annu a pustis.
6. S'apariciaudra de su traballu de su personali comunali est cuncordada sighendi is lìnias de caminu amostadas de is òrganus cullegialis e is determinatzionis impreadas de sa Cunferèntzia de is dirigentis.
7. S'Aministratzioni assegurat s'imparamentu, s'adelantamentu e s'arricadura professionali de is traballadoris.
8. Su Comunu arreconnoscit e amparat s'organizatzioni sindacali libera de is traballadoris comunalis, cuforma a is leis vigentis.
9. Sa responsabilidadi de is dipendentis comunalis est cumandada de su s'ituu de sa autonomia de scioberu in sa cumpridura de is funtzionis entregadas. Est arreconnota e cunformada castiendi is dèpiris de dònna operatori.
10. Su personali est apariciu castiendi a is allegas de sa partecipatzioni individuali, calificadura professionali, responsabilizatzioni, movidura, professionalidadi.
11. Sa manera funtzionali-apariciadora chi si depit favoressit est cussu fundau apitzu de sa interdisplinariedadi e de sa partecipatzioni.

12. A sa cumpridura de cussu cumandau de custu articulu si traballat cun is maneras cumandadas de su regulamentu apòsitu.

SEGUNDU CÀBUDU: SU SEGRETÀRIU GENERALI E DIRETORI GENERALI

Art. 99 Arrolu e tareas

1. Su Segretàriu Generali est numenau e bogau de su Sìndigu cunforma a sa lei.
2. Su Segretàriu Generali, sighendi is inditaduras cumandadas de su Sìndigu, de su cali dipendit funtzionalmenti, subraintendit, cun arrolu e tareas de diretzioni manna, a sa cumpridura de is funtzionis de is Dirigentis, chi depit cuncordai s'atividadi insoru, assegurendi sa unidadi operativa de s'organizatzioni comunali in sa sighidura de is inditaduras e de is diretivas amostadas de is òrganus eligidoris, a foras de candu po is sentidus e po is consequènzias de su primu comma de s'art. 108 de su D. Lgs. 267/2000, su Sìndigu at numenau a su Diretori Generali.
3. Su Segretàriu Generali, po sa cumpridura de is funtzionis insoru, impreat sa strutura, is servìtzios e su personali de s'Enti; cumprit tareas de cullaboratzioni e funtzionis de assistèntzia giurìdicu-aministrativa bia a is òrganus de s'Enti, cunforma a su stremu aministrativu, a is leis, a su statutu e a is regulamentus. In prus su Segretàriu Generali:
 - a) pigat parti cun tareas consultivas, referentis e de assistèntzia a is acorradas de su Cunsillu e de sa Giunta e ndi incurat sa verbalizatzioni;
 - b) podit rogai totus is cuntratus aundi s'Enti fait parti e cunfrimai scriduras privadas e àutus unilateralis in s'interessu de s'Enti;
 - c) cunfrimat dònna atra funtzioni chi dd'at donau su statutu o is regulamentus, o chi dd'at donau su Sìndigu e chi no siant giai de cumpetèntzia de atrus òrganus.
4. Casumai su Sìndigu impreit su scioberu de numenai su Diretori Generali, a sa pròpiu manera providit a cuncordai is relatas intre su Segretàriu Generali e su Diretori Generali e totu, arrespetendi is arrolus insoru diferentis e autònomus.
5. In acontèssiu de ausèntzia o de arrescidura si pigat is funtzionis vicàrias su Vice-Segretàriu Generali.
6. Is funtzionis vicàrias funt entregadas a atru Dirigenti de su setori, chi portat is requisiti cumandaus, in acontèssiu de ausèntzia o arrescidura a su pròpiu tempus de su Segretàriu e de su Vice Segretàriu Generali.

Art.100 Su Vice segretàriu Generali

1. Est apariciada sa posidura de Vice-Segretàriu Generali chi tenit califica funtzionali apicali. Cumprit is funtzionis de ajudai a su Segretàriu Generali in sa cumpridura de is atividadis aministrativas chi dd'ant entregau e ddu arremprasat in is acontèssius de vacàntzia, ausèntzia o arresciudra.
2. Is maneras e is requisiti de intrada a sa posidura de Vice-Segretàriu Generali funt cuncordaus de su regulamentu.

Art.101 Su Diretori Generali

1. Su Sìndigu, apustis de sa deliberatzioni de sa Giunta Comunali, podit numenai cun decretu a unu Diretori Generali, puru a foras de sa frunidura orgànica e cun cuntratu a tempus determinau scioberendi-ddu *intuitu personae*.
2. Su Diretori Generali depit tenni su tìtulu de stùdiu de su diploma de làurea e de a su mancu 5 annus de esperièntzia cumpria e documentada in entis e aziendas pùblicas o privadas in sa carriera diretiva.
3. Su Diretori Generali arricit unu pagamentu intreu no prus bàsciu de cussa previdia po is Dirigentis de su Comunu e de dònna manera no prus manna de custa amanniada de su 50 po centu.
4. Su Diretori Generali est bogau cun decretu de su Sìndigu, a pustis de sa deliberatzioni de sa Giunta Comunali. Su tempus de s'incàrrigu no podit èssiri prus mannu de cussu de su mandau de su Sìndigu.
5. Candu su Diretori generali no siat stètiu numenau, is funtzionis alliongiadas podint èssiri entregadas de su Sìndigu a su Segretàriu Generali. Intzaras a custus tocat unu pagamentu in prus de una indennidadi *ad personam* aguali a su màssimu de cussa de posidura previdia po is Dirigentis de is entis de 1ª classi B de su CCNL de is Dirigentis.
6. Su Diretori Generali cumprit is caminus e is tareas cumandadas de is òrganus de governu locali sighendi is cumandus donaus de su Sìndigu e subrintendit a sa gestioni de s'enti, persighendi livellus de primori de aficatzidadi e de atùliu. In manera particolari: apariciat su pianu ditallau de is tareas, cumentu puru sa propònnida de pianu cumpridori de gestioni, cunforma a is artìculus 108, 169 e 197 - comma 2, lit. "a" - de su D. Lgs. 267/2000; cumprit dònna atra funtzioni entregadade custu statutu, de is regulamentus e de su cuntratu individuali o delegada de su Sìndigu. Cun custas tareas, a su Diretori Generali torrant sceda, in sa cumpridura de is funtzionis entregadas a issus, is Dirigentis de s'Enti, a foras de su Segretàriu Generali de su Comunu.

SU DE TRES CÀBUDU: IS DIRIGENTIS

Art.102 Tareas

1. Is Dirigentis apariciant e ghiant, ponendi menti a s'ordinamentu specifìcu, is ufizius e is servìtzius comunalis a is calis funt imbordigaus, sighendi is tareas e is arrègulas cuncordadas de custu Statutu e de is regulamentus. Cumpriat tareas de direzioni, coordinamentu e scrucullu de is struturas de is calis funt responsàbilis, assegurendi-ndi sa imparzialidadi, sa legalidadi e sa currispondèntzia de s'interessu pùblicu.
2. Est entregada a is Dirigentis sa responsabilidadi autònoma de sa gestioni amministrativa chi pertocat a is tareas e a is funtzionis de is setoris chi faint parti de is ufizius e de is servìtzius chi dependint de issus, chi benit cumpria de cussus e totu po sa cumpridura de is tareas e de is programas scioberaus de is òrganus comunalis, cunforma a is indiritzus apariciaus de issus e totu.
3. Su regulamentu apitzus de s'ordinamentu de is ufizius e de is servìtzius cuncordat

sa entrega a si Dirigentis de is responsabilidadi gestionalis de su comma 2, cun arrègulas chi si cunformant a s'allega chi is poderius de indiritzu e de scrucullu tocant a is òrganus comunalis e sa gestioni amministrativa est entregada a is Dirigentis.

4. Su regulamentu apitzu de s'ordinamentude is ufizius e de is servìtzius cuncordat puru is maneras de coordinamentu intre su Diretori Generali e in farta sua intre su Segretàriu e is Dirigentis, chi depint assegurai su acòrdiu intre is relatas interfuntzionalis intre is struturas operativas de s'Enti, de manera de assegurai sa integratzioni a pari pari e sa coerèntzia unidària de su traballu amministrativu de su Comunu.

5. Is Dirigentis, in sa cumpridura de is funtzionis previdias de sa Lei, ndi assegurant sa cumpridura.

6. In manera particulari a is Dirigentis tocant, cunforma a is diretivas de su Sìndigu, de su Diretori Generali, castiendi a is cumpetèntzias respetivas de responsàbili de s'Aministratzioni e de coordinadori de is Dirigentis, is cumpriduras po is funtzionis sighidoras:

- a) apariciai propònnidas po su Sìndigu, puru po is tareas de sa apariciadura de programas, de progetus e de àutus amministrativus;
- b) apariciai sa cumpridura de is programas cumandaus de is òrganus políticus e de governu a cun custa tarea carculendi is risorsas chi serbint po sa cumpridura de cussus e totu, assurendi legalidadi, economitidadi, eficatzidadi e atùliu;
- c) determinai is impènnius de gastu e sa licuidatzioni imbordigada, pigaus in is trèminis de is stantziamentus de balanzu e de arricidura de is intradas, castiendi Lei, Deliberatzioni e/o Determinatzioni;
- d) arriciri is àutus chi pertocant a su tratamentu giuridicu de is traballadoris, in is trèminis cuncordaus de is regulamentus e sighiri cun sa atributzioni de is tratamentus econòmicus alliongiaus, sighendi cussu chi est cumandau in is cuntratus culletivus;
- e) impelli e asseliai is chèscias cun su poderiu de cunciliai e transiri;
- f) coordinai is atividadis de is responsàbilis de is procedimentus amministrativus a pustis de ddus àiri agataus cunforma a sa Lei 7 de Austu 1990 n. 241;
- g) pediri deretu parris a is òrganus consultivus de s'aministratzioni e donai scedas a is rilevamentus de is òrganus de scrucullu apitzus de is àutus de cumpetèntzia;
- h) averiguai dònna tanti is càrrigus de traballu de su personali cun is tareas de produtividadi de is ufizius chi ghiant e preguntai a su Diretori Generali, in acontèssiu de strobis, is provedimentus arrechèdius po straviai a lestru is strobis agataus. Sa averiguadura e su scrucullu de is atividadis de is dipendentis de su setori ant a èssiri arregulaus de su regulamentu apòsitu. Is Determinatzionis arricias de is Dirigentis funt publicadas deretu in s'Albu Pretòriu e ndi aturant apicadas po cuindixi diis.

7. A is Dirigentis tocant, in prus, custas tareas:

- a) sa presidèntzia de is cumissionis de gara e de cuncursu;
- b) sa responsabilidadi de is proceduras de arrendu e de cuncursu;
- c) sa apariciadura de is cuntratus;
- d) is àutus de gestioni finantziària, cumprèndia puru sa apariciadura de is impènnius de gastu;
- e) is àutus de amministratzioni e gestioni de su personali;
- f) is provedimentus de autorizatzioni, concessioni o simbillanis, sa cali spratzinadura aparicit acramentus e valutatzionis, puru de genia discretzionali, arrespetendi is arrègulas spratzinadas de sa Lei, de is regulamentus, de àutus generaus de indiritzu cumprèndias puru is autorizatzionis e is concessionis

edilìtzias;

- g) is atestatzionis, certificatzionis, comunicatzionis, legalizatzionis e dònna atru àutu chi faint manifestatzioni de giudìtziu e de connoscèntzia;
- h) is àutus entregaus a cussus de su Statutu e de is regulamentus o, sighendi cussus, delegaus de su Sìndigu.

8. Su Sìndigu entregat a is Dirigentis sa titularidadi de is ufìtzius e de is servìtzius cunforma a is cumandus de s'art. 50, comma 10, de su D. Lgs. 267/2000. Is maneras po s'entrega a is Dirigentis de sa titularidadi de is ufìtzius funt cuncordadas de su regulamentu apitzus de s'ordinamentu de is ufìtzius e de is servìtzius.

9. Is Dirigentis funt responsabilis de manera dereta de sa cumpridura de is tareas scioberadas de is òrganus polìticus chistionendi de atùliu, curregidura, calidadi, cantidadi e tempestividadi sighendi is allegas generalis chi arrègulant is tareas de sa dirigèntzia in su sìtiu de sa aministratzioni pùblica.

10. Su regulamentu apitzus de s'ordinamentu de is ufìtzius e de is servìtzius cumandat is arrègulas determinadas de manera ogetiva po sa valutatzioni de s'atividadi de is Dirigentis, cumprèndius puru cussus chi petocant a is valutatzionis apitzus de is inosservàntzias de su Statutu e de is regulamentus.

Art.103 Diretzioni de s'organizatzioni

1. Su setori organizadori funtzionali apariciat sa strutura de mannesa màssima chi ddoi est in s'Enti e est deretu de manera obligatòria de unu funtzionàriu chi tenit sa calìfica dirigentziali. In s'acontèssiu de ausèntzia interina de sa posidura su Sìndigu incàrrigat a unu Dirigenti de sa regèntzia de su setori, chi amuntonat custu incàrrigu cun is cumpetèntzias cumprias giai.

2. Is servìtzius e is ufìtzius funt struturas sub-ordinadas a su setori, deretas de funtzionàrius chi tenint una spetzializatzion manna me is funtzionis cumprias de sa strutura.

3. Is posiduras de calìfica dirigentziali o de spetzializatzioni manna podint èssiri cumprius atruessu cuntratu de deretu privau, in is trèminis previdius de sa normativa vigenti e de su regulamentu apitzus de s'ordinamentu de is ufìtzius e de is servìtzius.

4. Su Sìndigu in prus podit cumandai s'arrescidura antetzipada de s'incàrrigu a su Dirigenti, cun provedimentu arrexonau, candu su tanti de is arresultaus lòmpius bessat pagu profetosu po is apretus de s'Enti. Aturat sempri bàlidu su deretu de amparu e de controdedutzioni de s'imbordigau.

5. Is Dirigentis de aforas - numenaus *intuitu personae* de su Sìndigu, puru extra pianta orgànica - depint tenni is pròpius requisitus pedius po s'intrada de aforas a sa calìfica de cumpriri, sighendi cussu chi est cumandau de su regulamentu apitzus de s'ordinamentu de is ufìtzius e de is servìtzius.

6. Is Dirigentis de aforas depint ponni menti a is arrègulas cumandadas po is Dirigentis de su Comunu de s'ordinamentu giurìdicu e contratuvi vigenti, de custu Statutu e de su regulamentu apitzus de s'ordinamentu de is ufìtzius e de is servìtzius.

Art.104 Cunferèntzia de is dirigentis e cunferèntzia de programa

1. Sa cunferèntzia de is Dirigentis est presidiada de su Diretori Generali e est apariciada de totus cussus chi pertocant a is calìficas dirigentzialis. Sa cunferèntzia coòrdinat a sa cumpridura de is tareas de s'Enti, stùdiat e cuncordat is simprificaduras proceduralis e proponit a is innoamentus tennològicus cunsideraus netzessàrius po apariciai sa adelantadura sighia de s'organizazioni de su traballu, impari cun su nùcleu po su càstiu de gestioni e sa valutazioni de is Dirigentis.
2. Po coordina sa cumpridura de programas, progetus e initziativas chi pedint s'interbènnida de medas àreas funtzionalis, su Diretori Generali apariciat una cunferèntzia de is Dirigentis de is setoris imbordigaus, aundi benint impreaus is scioberus e promòvius is provedimentus de cumpriri, in su tempus prus lestru, is deliberatzionis impreadas de is òrganus collegiali de su Comune.
3. Is verbalis de is acorradas funt imbiaus de su Diretori Generali a su Sìndigu, a su Presidenti de su Cunsillu Comunali, a su Vice-Sìndigu, a is Assessoris comunali e a is Capigruppo cunsillaris.

Art.105 Atributzioni de sa tarea de diretzioni, de coordinamentu e de programatzioni.

1. Su regulamentu apitzu de s'ordinamentu de is ufizziuse de is servìtzius podit apariciai àreas omogèneas funtzionalis interdisciplinaris chi imbòrdigant a medas setoris.
2. S'incàrrigu de diretzioni e de coordinamentu de is àreas numenadas est entregau de su Sìndigu a is Dirigentis de su setori o a genti de calificadura professionali cunfrimada, cun diploma de làurea, cun esperièntzia crara de su setori po unu tempus no prus piticu de cinqu annus.
3. S'incàrrigu chi si aciungiy a sa diretzioni de sa strutura apicali est entregau in is trèminis de su tempus de su mandau de su Sìndigu, e si podit bogai, in calisiat momentu, cun provedimentu arrexonau.

**SU DE SES TÌTULU:
SERVÌTZIUS PÙBLICUS COMUNALIS**

SU DE SES TÌTULU: SERVÌTZIUS PÙBLICUS COMUNALIS

PRIMU CÀBUDU: CUMPETÈNTZIAS DE IS COMUNUS

Art.106 Servìtzius Comunalis

1. Su Comunu providit a s'impianu e a sa gestioni de is servìtzius pùblicos chi tenint cumentu ogetu sa produssidura de benis e atividadis fatas po apariciai tareas sotzialis e incurat a is interessus de sa Comunità impellendi-ndi s'adelantamentu e su progressu.
2. Tocat a su Cunsillu Comunali agatai servìtzius pùblicos nous de ativai, in su tempus, cunforma a is apretus chi acontessint in sa Comunità e de scioberai is maneras e is mudàntzias po sa gestioni cosa insoru. Funt de cumpetèntzia de cussu Cunsillu Comunali e totu is mudàntzias a is maneras de gestioni de is servìtzius apariciaus.
3. Is servìtzius sa cali gestioni est resguardada de manera escludora a su Comunu funt scioberaus de sa lei.

Art.107 Maneras de gestioni

1. Po sa gestioni de is servìtzius pùblicos su Comunu impreat una de is maneras previdias de s'artìculu 113 de su D. Lgs. 267/2000.
2. Su Comunu casumai bessant a foras cunditziunis de importu tènnicu e profetu sotziali cumentu puru de cumbenèntzia econòmica, podit impreai maneras de cuncessioni a privaus e/o sotziedadis de capitalis.
3. Su scioberu de is maneras de gestioni de impreai me is matèrias de cumpetèntzias benit cuncordada de su Cunsillu Comunali e totu a gforas de is critèrius de s'artìculu 114 de su D. Lgs. 267/2000, sighendi is scrucullus cumparadoris fundaus a pitzu de allegas de oportunitadis, de cumbenèntzia econòmica, de atùliu de gestioni, castiendi sa genia de su servìtziu de donai e a is interessus pùblicos berus de lompi. Po custa tarea, po cussu chi pertocat a is allegas econòmicu-finanziàrius, su Cunsillu Comunali pigat de manera prebennidora una relata cumpria de su Cullègiu de is Revisoris.
4. Totus is maneras de gestioni scioberadas impreant a fundòriu de s'iniziativa insoru, s'allega de su cuntenimentu e de sa impitadura de is sperdìtzius energèticus.
5. Sa delìbera cunsillari de assuntzioni de su servìtziu pùbliku locali depit acrarai beni me is arresonis:
 - a) sa produssidura de cosas e atividadis chi punnant a sa cumpridura de is tareas sotzialis chi funt s'ogetu de su servìtziu e s'allongiamentu imbordigau cun s'adelantamentu econòmicu e tzivili de sa Comunità locali;
 - b) sa mannesa sotziali arreconnota a sa atividadi e a is tareas econòmicus e funtzionalis sighius;
 - c) is elementus de mannesa de su servìtziu e is cunsequèntzias apariciadoras allongiadas, puru cun atrus servìtzius allongiaus gestius de sa pròpia

aministratzioni o a maneras eventualis de cullaboratzioni cun atrus entis localis;
d) is relatas cun is atrus òrganus comunalis sobraus.

6. Sa deliberatzioni cunsillari in prus depit acrarai, dònna borta, po cussu chi pertocay a is medas maneras de gestioni scioberadas:

- a) is arresonis tènnicas, econòmicas e de profetu sotziali in s'acontèssiu de entrega a atra genti;
- b) is elementus econòmicus e imprenditorialis de is servìtzius chi pedint sa gestioni po azienda spetziali;
- c) is arresonis chi faint favoràbili sa gestioni de is servìtzius sotzialis atruessu de s'istitutzioni;
- d) is arrexonus, chi pertocant a sa natura de su servìtziu, chi faint profetosa sa partecipazioni de atrus sogetus pùblicus o privaus atruessu de sa sotziedadi po atzionis puru cun capitali pùblicu locali prevalenti o puru cun sotziedadis a responsabilidadi limitada.

7. Po sa bogadura o sa pinnigada de is servìtzius pigaus de su Comunu si impreant, cumentis compatibilis, is pròpias maneras cumandadas de custu articulu.

Art.108 Nòmna de is aministradoris

1. Is aministradoris de is sotziedadis a partecipazioni comunali, de is aziendas spetzialis e de is istituzionis benint numenaus de su Cunsillu Comunali intre genti chi tèngiant is requisitus po sa eligibilitadi a Cunsilleri Comunali e una cumpetèntzia tènnica o amministrativa cunfrimada.

2. Aintru de binti diis de s'aposentamentu su Cunsillu Comunali delìberat is indiritzus po is nòmna cunforma a s'art. 42 - līt. "m". - e art. 50, comma 8, de su D. Lgs. 267/2000.

3. Po sa bogadura de is arresonis de incompatibilitadi si impreant is arrègulas cuncordadas de sa lei po si Cunsilleri Comunalis.

4. Su scioberu de is candidaus acontessit sighendi unu avisu pùblicu chi depit amostai is caraterìsticas de s'incàrrigu e sa professionalidadi pedia. Is dimandas funt castiadas de sa Cumissioni cunsillari permanenti imbordigada. Is maneras po sa presentada de is candidaduras e po sa averiguadura de is requisitus funt ghiaus de su regulamentu de su Cunsillu Comunali.

SU DE DUUS CÀBUDU: GESTIONI DE IS SERVÌTZIUS PÙBLICUS LOCALIS

Art.109 Gestioni de is servìtzius

1. Su Comunu spratzit is servìtzius entregaus sighendi sa normativa vigenti. Sa gestioni podit acontèssiri de manera dereta o atruessu de s'affilladura a is provaus sighendi is arrègulas de economitzidadi, eficatzidadi e atùliu.

2. Cun regulamentu apòsitu su Cunsillu Comunali scioberat is arrègulas de gestioni de is servìtzius, is maneras po s'impiticamentu de is gastus e po sa lòmpera de livellus mannus de calidadi de prestatzionis; scioberat is currispetivus de donai a is impreadoris e is gastus sotzialis pigaus de su Comunu, arrespetendi is arrègulas de lei vigentis.

Art.110 Sa entrega a atrus de is servìtzius

1. Su Cunsillu Comunali, candu ddoi funt arresonis tènnicas, econòmicas e de profetu sotzialis, podit afillai sa gestioni de servìtzius pùblicos in cuncessioni a atrus.
2. Sa cuncessioni est arregulada de cunditziònis chi depint assegurai: sa cumpridura de su servìtziu a mannesas de calidadi chi currispundant a is apretus de is tzitadinus-impreadoris, sa ratzionalidadi econòmica de sa gestioni cun is efetus sighidoris po is gastus tentus de su Comunu e de is impreadoris e sa apariciadura de is interessus pùblicos generalis.
3. S'entrega de sa cuncessioni de is servìtzius acontessit, de costumàntzia, cumprendi a su scioberu de su contraenti atruessu de proceduras de gara scioberadas de su Cunsillu Comunali cunforma a cussu chi est previdiu de sa lei e de su regulamentu apòsitu, cun arrègulas chi assegurint sa partecipazioni a cussa e totu de unu muntoni de sugetus chi portant is recuistius cunfrimaus de professionalidadi aici bonus de assegurai sa cumpridura de is cunditziònis prus favoràbilis po s'Enti.

Art.111 Is aziendas spetzialis

1. Sa gestioni de is servìtzius pùblicos comunalis podit èssiri fata imperendi aziendas spetzialis chi podint fruniri servìtzius de importu econòmicu e imprenditoriali.
2. Is aziendas spetzialis funt entis strumentalis de su Comunu chi portant una personalidadi giuridica, autonomia imprenditoriali e unu statutu cosa sua aprovau de su Cunsillu Comunali.
3. Funt òrganus de s'azienda su Cunsillu de Aministratzioni, su Presidenti e su Diretori.
4. Su Cunsillu de Aministratzioni est numenau sighendi cussu cumandau in s'art. 108, commas 1 e 2, de custu Statutu. Sa cumposidura sua numèrica est cuncordada de su Statutu Aziendali chi cuncordat puru is maneras de pinnigadura de is Aministradoris.
5. No podint èssiri elìgius a is càrrigas de su comma 4 cussus chi in su mandu aministrativu in caminu, in su tempus de sa numenada, tèngiant o ant tentu custas càrrigas chi sghint:
 - a) Assessori;
 - b) Cunsilleri comunali o circoscritzionali;
 - c) Revisori de is Contus;
 - d) Dipendenti de su Comunu o de atras aziendas comunalis;
 - e) Personali de aforas cunventzionau o assùmiu de su Comunu cun cuntratu de deretu privau
6. Su Diretori est s'òrganu a su cali tocat sa diretzioni gestionali de s'azienda cun is responsabilidadi chi sghint. Benit numenau de su Cunsillu de Aministratzioni de s'azienda e totu, sighendi is maneras scioberadas de su Statutu de s'azienda chi cuncordat puru is ipòtesis de pinnigadura.
7. S'ordinamentu e su funtzionamentu de is aziendas spetzialis funt cuncordaus, in su situ de sa lei, de su Statutu e de is Regulamentus insoru. Is aziendas me is atividadi cosa insoru, depint tenni cumentis tareas s'eficatzidadi, s'atùliu e sa economitzidadi. In prus tenint su cumandu de s'aparixu de is gastus e is godàngius, cumprèndius puru is

trasladamentus.

8. Sa apreciadura de dònna azienda spetziali est deliberada de su Cunsillu Comunali chi ndi depit amostai is arrègulas cumparadoras de atùliu cun sa gestioni in economia e privatistica e su capitali de dotatzioni de entregai e is trastus de finantziamentu imbordigaus. Su Cunsillu Comunali ndi cuncordat is tareas e is indiritzus, aprovat is àutus de fundòriu, averìguat, atruessu de su Sindigu chi podit pigai àutus e documentus, is arresultaus de gestioni e providit a sa crobetura de gastus eventualis de genia sòtziu-assistentziali.

9. Su Statutu de is aziendas spetzialis previdit unu òrganu apòsitu de revisioni de is gastus e maneras autònomas de averiguadura de sa gestioni e, po cussas de mannesa econòmica prus manna, de certificatzioni de su balantzu.

Art.112 Relatas cun su Comunu

1. Cunforma a cussu cumandau in su comma 6 de s'artìculu 114 de su D. Lgs. 267/2000, funt resguardaus a sa aprovatzioni de sa Giunta, cunforma a delìbera de su Cunsillu Comunali a norma de s'artìculu 42 de su D. Lgs. 267/2000:

- a) su pianu-programa, sa cali aprovatzioni est antetzipada de unu chistionu de su Cunsillu Comunali apitzus de is indiritzus generalis;
- b) su balantzu pluriennali e su balantzu prebennidori econòmicu cumentu puru sa relata previsionali,
- c) su contu consultivu;
- d) is cumbentzionis cun is entis localis chi ocasionint sa amannadura partziali o intrea de su servìtziu aforas de su territòriu comunali,
- e) sa partecipatzioni a sotziedadis de capitali o apariciaudra de sotziedadis is calis tareas sotzialis cumprint de manera intrea o po una parti sceti cun cussus de s'azienda e sempri chi su traballu no pertochit a totu su muntoni de servìtzius affillaus giai a s'azienda o a una parti manna de cussus.

2. Dònna atru àutu de s'azienda chi pertocat a sa frunidura de su servìtziu est resguardau a sa autonomia gestionali de s'azienda e totu, chi ndi providit cunforma a su statutu cosa sua.

3. Su càstiu apitzu de sa atividadi de is aziendas spetzialis est cumpria de su Sindigu, atruessu de is setoris comunalis cumpetentis in cuss'allega, chi providit a fai sciri a is Capigruppo Cunsillaris e a is Cumissionis cumpetentis de manera chi potzant averiguai sa coerèntzia de sa gestioni aziendali cun is àutus de indiritzu impreaus de su Cunsillu Comunali.

4. Is relatas de is Cumissionis de su comma 3 cun is òrganus de s'azienda, cumprèndiu s'òrganu de revisioni, funt cuncordada de su regulamentu de su Cunsillu Comunali.

5. Is relatas previsionalis e a consuntivu, deliberadas de su Cunsillu de Aministratzioni de s'Azienda, benint imbiadas, impari cun sa tzerriada de s'Acorrada , a is Capigruppo de su Cunsillu Comunali.

Art.113 Is istituzionis

1. Po sa cumpridura de is servìtzius sotzialis, culturali e educadoris, chene de importu imprenditoriali, su Cunsillu Comunali podit apariciai istituzionis, organismus

strumentalis de su Comunu, chi tenint autonomia giuridica sceti.

2. Po s'eligidura, sa bogadura e sa motzioni de scunfiantza de su Presidenti e de su Cunsillu de Aministratzioni si impreant is arrègulaas de is commas 1 e 2 de s'articulu 108.

3. S'ordinamentu e su funtzionamentu de is istituzionis est cuncordau me is regulamentus comunalis.

4. Is istituzionis persighint, in sa atividadi insoru, crèterius de eficatzidadi, atùliu e economitzidadi e tenint su cumandu de aparixu de sa gestioni finantziària, assegurau atruessu de s'echilìbriu intre gastus e godàngius, cumprèndius puru is traslamenteus.

5. Su Cunsillu Comunali scioberat is mesus finantziàrius e is struturas chi pertocant a is istituzionis, ndi cuncordat is tareas e is indiritzus, aprovat is àutus de fundòriu, cumprit su càstiu e averìguat is arresultaus de sa gestioni.

Art.114 Is sotziedadis po atzionis

1. Po sa gestioni de is servìtzius localis de importu mannu chi ocasionant puru imbistimentus finantziàrius mannus e una organzazioni imprenditoriali o chi funt impreaus de manera manna de setoris de atividadis econòmicas, su Cunsillu Comunali podit promovi sa apariciadura de sotziedadis po atzionis puru a capitali pùbliku locali no prevalenti cun sa partecipazioni de atrus sugetus pùblicos o privaus. Po sa istituzioni si fait arremòniu a is stremus cumandaus me is articulus 115 e 116 de su D. Lgs, 267/2000 e si ponit menti a is allegas chi ddoi funt in custu Statutu.

2. Su Cunsillu Comunali, apustis de sa propònnida de sa Giunta, aprovat unu pianu tènnicu-finantziàriu chi pertocat a sa apariciadura de sa sotziedadi e a is prevididuras chi pertocant a sa gestioni de su servìtziu pùbliku cun cussa e totu e entregat a su Sindigu is poderius po is àutus sighidoris.

3. Me is sotziedadis numenadas in su comma 1 si si scioberat sa primatzia de su capitali pùbliku locali cussa est apariciada cun sa entrega de sa majoria de is atzionis a is Entis Pùblicos chi ndi entregant sa majoria de su capitali. Is entis numenaus podint apariciai, po intreu o po una parti, su tanti chi pertocat a sa partecipazioni sua cun sa entrega de cosas, impianbtus e atras dotatzionis chi tenint sa tarea de servìtzius afillaus a sa sotziedadi.

4. In s'àutu costitutivu e in su Statutu est scioberada sa rapresentàntzia numèrica de su Comunu in su Cunsillu de Aministratzioni e in su Cullègiu Sindacali e su scioberu de resguardai cussas nòminas e sa bogadura eventuali insoru a su Cunsillu Comunali.

**SU DE SETI TÌTULU:
GENIAS ASSOTZIADORAS E DE
COOPERATZIONI INTRE IS ENTIS**

SU DE SETI TÌTULU: GENIAS ASSOTZIADORAS E DE COOPERATZIONI INTRE IS ENTIS

PRIMU CÀBUDU: CUNVENTZIÒNIS E CUNSÒRTZIUS

Art.115 Cunventzionis

1. su Cunsillu Comunali, cun sa tarea de cumpriri is tareas de ratzionalidadi econòmica e apariciadora, podit deliberai sa apariciadura de cumbentzionis apòsitas cun atrus Comunas e atrus entis territorialis, po cumpriri de manera alliongiada funtzionis e servìtzius scioberaus.

2. Is cumbentzionis depint acrarai is tareas, atruessu de s'acramentu de is funtzionis particularis e de is servìtzius in ogetu de cussas e totu, su tempus suu, is maneras e sa sighidura de is consultazionis intre is entis cuntraentis, is relatas finantziàrias chi ddoi funt intre issas, is cumandus e seguràntzias a pari pari.

3. In sa cumbentzioni is entis cuntraentis scioberant chi unu de cussus si pighit su coordinamentu apariciaodri e amministrativu de sa gestioni, chi si depit fai cunforma a is determinatzionis chi ddoi funt aintru e a is acòrdius chi benint de si consultazionis periòdicas intre cussus chi nci pigant parti.

4. Sa cumbentzioni depit arregulai is entregas de cumintzu de is capitalis e de is benis de dotatzioni e is maneras po ddus spratziri intre is entis partitzipantis a sa scadèssida cosa sua.

Art.116 Cunsòrtzius

1. Po sa gestioni assotziata de unu o prus servìtzius o funtzionis su Cunsillu comunali podit deliberai sa apariciadura de unu Cunsòrtziu cun atrus Comunas e, candu interessaus, cun sa partecipatzioni de atrus entis territorialis, aprovendo cun sa majoria de is duus tèrtzius de is Cunsilleris imbordigau:

- a) sa cumbentzioni chi scioberrat is tareas e su tempus de su Cunsòrtziu;
- b) sa trasmitidura, cun sighidura annuali, a is entis chi pertocant a is àtus de fundòriu aprovaus de s'Acòrru;
- c) is relatas finantziàrias e is cumandus de donniunu e seguràntzias intre is entis cunsortziaus;
- d) su statutu de su Cunsòrtziu.

2. Su Cunsòrtziu est enti strumentali de is entis cunsortziaus, chi tenit personalidadi giurìdica e de autonomia apariciadora, gestionali e de asienda.

3. Funt òrganus de su Cunsòrtziu:

- a) s'Acòrru furmada de is rapresentantis de is entis assotziaus, donniunu cun responsabilidadi e poderius agualis a su tanti de partecipatzioni scioberau de sa cumbentzioni e de su statutu;
- b) su Cunsillu de Aministratzioni e su Presidenti suu eligius de s'Acòrru. Sa cumposidura de su Cunsillu de Aministratzioni, is requisitus e is cnditzionis de eligibilidadi, is maneras de eligidura e de bogadura funt scioberadas de su statutu de su Cunsòrtziu.

4. Is membrus de s'Accorru acabant cussu incàrrigu cun s'acabu de sa càrriga de su Sindigu e cussus e totu benint arremprasaus de is titularis nous eligius a cussas càrrigas.

5. Su tempus de su mandau de su Cunsillu de Aministratzioni e de su Presidenti est scioberada de su Statutu de su Cunsòrtziu.

6. S'Accorru aprovat is àutus de fundòriu de su Cunsòrtziu, previdius in su statutu cosa sua.

7. Candu sa mannesa organizadora e econòmica de is funtzionis o de is servìtzios ddu fetzat arrechèdia, su Cunsòrtziu nòminat, sighendi cussu chi est previdiu de su statut e de sa cumbentzioni, su Diretori, a su cali tocat sa responsabilidadi gestionali de su Cunsòrtziu.

8. Su Cunsòrtziu est imbordigau asuta de is arrègulas chi pertocant a su scrucullu de is àutus de is Entis Localis.

SEGUNDU CÀBUDU: ACÒRDIUS DE PROGRAMA

Art.117 Obras de cumpetèntzia primària de su Comunu

1. Po cumpriri a sa definitzioni e cumpridura de obras, interbènnidas e programas de interbènnida chi bolint, po èssiri apariciaus po intreu, su traballu alliongiu e coordinau de su Comunu e de atras Aministratzionis e sugetus pùblicos, su Sindigu, poita aturat sa cumpetèntzia primària o prevalenti de su Comunu apitzu de sa obra, apitzu de is interbènnidas e programas de interbènnida, promovit sa serrada de unu acòrdiu de programa po assegurai su coordinamentu de totus is stremus e atividadis e po scioberai tempus, maneras, finantziamentus e dònna atra cumpridura alliongiada.

2. Su Sindigu tzèrriat una cunferèntzia intre is rapresentantis de totus is aministratzionis imbordigadas po averiguai sa possibilidadi de cuncordai s'acòrdiu de programa.

3. Su Sindigu, cun àutu furmali cosa sua, aprovat s'acòrdiu aundi est amostau su cunsensu unànime de is Aministratzioni imbordigadas e ndi cuncordat sa publicatzioni in su bulletinu ufiziali de sa Regioni.

4. Casumai s'acòrdiu siat impreau cun decretu de su Presidenti de sa Regioni e ocasionit mudàntzias de is trastus urbanisticus de su Comunu, s'adesioni de su Sindigu a cussu e totu depit èssiri cunfrimada de su Cunsillu Comunal, aintru de trinta diis, a pena de sa decadèssida.

5. In s'acontèssiu chi s'acòrdiu de programa siat promòviu de un'atru sugetu pùblicu chi at cumpetèntzia primària in sa cumpridura de is obras, interbènnidas e programas, aundi aturit unu interessamentu de su Comunu a pigai parti a sa cumpridura insoru, su Sindigu pigat parti a s'acòrdiu, fendi-ddu sciri a sa Giunta e a su Cunsillu, e assegurat sa cullaboratzioni de s'Aministratzioni comunali cunforma a is cumpetèntzias e a s'interessu, deretu o inderetu, de sa Comunità cosa sua a is obras, interbènnidas e programas de apariciai.

6. Si impreant po sa cumpridura de is acòrdius numenaus, siat po sa cumpridura de obras e siat po sa gestioni de is servitzius, is disposiduras cumandadas de sa Lei.

**SU DE OTU TÌTULU
GESTIONI ECONÒMICU-FINANTZIÀRIA
E CONTABILIDADI**

SU DE OTU TÌTULU: GESTIONI ECONÒMICU-FINANTZIÀRIA E CONTABILIDADI

PRIMU CÀBUDU: SA PROGRAMATZIONI FINANTZIÀRIA

Art.118 Sa programatzioni de balantzu

1. Sa programatzioni de s'atividadi de su Comunu est allongiada cun is risorsas finantziàrias chi si podint arriciri po dda cumpriri. Is àutus cun sa cali cussa benit cuncordada e rapresentada funt su balantzu de prevididura annuali, sa relata previsionali e programàtica e su balantzu pluriennali. Sa relata de is àutus numenaus est fata de manera de permiti sa ligidura e sa cumpridura de is prevididuras po programas, servìtzius e interbènnidas.

2. Sa relata previsionali programàtica aprovada de su Cunsillu est àutu de fundòriu de programatzioni.

3. Su balantzu de prevididura e is atrus documentus contàbilis numenaus in su comma 1, funt aparicius de sa Giunta Comunali, chi scrucullat e càstiat de manera prebennidora, impari cun sa Cumissioni cunsillari cumpetenti, is allegas po sa impostatzioni sua. Po sa apariciadura e ainnantis de sa serrada sua, sa Giunta e sa Cumissioni comunali, in acorrada allongiada, cuncordant is cuntènnius de importu prus mannu e in manera particolari is programas e is tareas.

4. Su balantzu de prevididura, allongiau de is àutus prescritus de sa Lei, est deliberau de su Cunsillu Comunali, aintru de is trèminis scioberaus de sa Lei, castiendi is allegas de unidadi, annualidadi, universalidadi, interessa, veridicidadi, atendibildadi, publitzidadi, aparixu econòmicu e finantziàriu e de s'ecuilibriu de balantzu.

5. Su Cunsillu aprovat su balantzu in setziada pùblica, cun su votu favoràbili de sa majoria de is Cunsilleris presentis. In is acorradas de segunda tzerriada su balantzu de prevididura, cun is àutus chi ddu acumpàngiant, podit èssiri postu in votatzioni sceti si siat presenti, in cussu tempus, a su mancu sa mitadi de is Cunsilleris in càrriga.

6. Su balantzu pluriennali amostat sa coerèntzia amministrativa e finantziària de is trastus de programatzioni de su Comunu e est unu presupostu furmali e amministrativu de is pianus finantziàrius de is imbistimentus comunalis.

7. Calisiat integratzioni de su pianu pluriennali de is imbistimentus, macari ocasionaus de leis spetzialis o de atributzionis o dèlegas de funtzionis, depit èssiri antetzipada de una averiguadura de is cunsequèntzias finantziàrias e de s'arreconoscimentu de s'ipòtesi gestionali scioberada, pighendi intzaras is eventualis mudàntzias a su balantzu pluriennali cun sa tarea de assegurai sa sigidura de is cumpatibildadis finantziàrias arrechèdias in su tempus mesanu.

Art.119 Gestioni Finantziària

1. Su Cunsillu, sa Giunta, is Cunsillus de Circoscritzioni e is Dirigentis, in su sìtiu de is atributzionis entregadas a issus de sa Lei e de custu Statutu, imbordighendi is gastus me is trèminis de is stantziamentus de balantzu e cunforma a is àutus de programatzioni.

2. Is Dirigentis, su Segretàriu o su Diretori Generali, ponendi menti a is critèrius scioberaus cun àutu de su Sìndigu e cun deliberatzioni de sa Giunta, impreant de manera automàtica a is àutus de imbordigamentu chi pertocant a su funtzionamentu costumau de is ufizius, me is trèminis e cun maneras previdias de su regulamentu de contabilidadi, e cussus chi si frimant a averiguai obligatzionis de innantis apitzu de s'Enti, cumentu puru is cumpriduras alliongiadaa a sa licuidatzioni e ordinatzioni de is gastus chi siant sighidoris a unu àutu spratzinau de is òrganus de su Comunu. Po su pagamentu de calisiat gastu dèpidu de su Comunu, is Dirigentis pedint a is servìtzius de ragioneria sa spratzinadura de is mandaus a profetu de is acreadoris.

3. Is Dirigentis tenint responsabilidadi dereta de sa coerèntzia de is àutus fatus de issus e de is documentus giustificativus alliongiaus cun is scioberus fatus de is òrganus de su Comunu.

4. Is deliberatzionis e is àutus chi de dònna manera permitantgastus apitzu de su balanzu de su Comunu, depint èssiri scoviaus a sa Ragioneria po s'averiguadura de sa imputatzioni currìgia, sa registratzioni de s'impìnniu de gastu relativu e no podint èssiri assùmius chene sa sussistèntzia de sa crobetura finantziària chi ddi pertocat.

5. Sa Ragioneria comunali, in sa cumpridura de is atividadis de scrucullu cosas sua, registratzioni e càstiu, si podit spratziri in servìtzius.

6. Me is setoris aundi siat apariciau unu servìtziu apòsitu de ragioneria, su responsàbili de cussu e totu, po is stantziamentus de balanzu entregaus a su setori specifìcu, cumprit a totus is funtzionis chi pertocant a sa Ragioneria in su sítu de sa gestioni finantziària de is leis, de su Statutu e de is regulamentus comunalis fendi, in sa cumpridura de custus impèrius a is dipendèntzias deretas de su Ragionieri cabu setori e in su càstiu de is inditaduras cumandadas de custus.

7. Is Dirigentis depint traballai po sa tarea, in sa cumpridura de is atributzionis insoru e asuta de sa responsabilidadi personali insoru, is intradas chi pertocat a is ufizius e is servìtzius de cumpetèntzia rispetiva siant averiguadas, entregadas e donadas a lestru e po intreu.

Art.120 Ordinamentu contàbili de su Comunu

1. S'ordinamentu contàbili de su Comunu est àutu chi pertocat a s'organizatzioni interna de s'Enti e est disciplinau de su regulamentu apòsitu, cumentu puru de is atras disposiduras comunalis chi arrègulant sa matèria, arrespetendi is leis statalis chi pertocant a craru a is entis localis e cunforma a is normas de custu Statutu.

Art.121 Su programa de is obras pùblicas e de is imbistimentus

1. Cunforma a su progetu de balanzu annuali sa Giunta proponit a su Cunsillu su programa de is obras pùblicas e de is imbistimentus chi pertocant a su tempus de vigèntzia de su balanzu pluriennali e spratziu in annus, cun cumintzu de s'annu apustis de sa aprovatzioni sua.

2. Su programa de is obras pùblicas e de is imbistimentus imbòrdigat s'elencu craru de dònna obra o imbistimentu imbòrdigau in su pianu, cun totus is elementus amostaus cumentu bonus po incarrerai sa cumpridura.

3. Su programa pertocat, po is gastus de tenni po is obras e is imbistimentus previdius po su primu annu, a su pianu finantziàriu chi arreconnoscit is risorsas chi ant a donai

cumpridura a cussu e totu.

4. Is prevididuras aintru de su programa currispondint a cussas amostadas de manera sintètica me is balantzus annuali e pluriennali. Is mudàntzias a is balantzus entegadas in su petantis de su traballu funt fatas a su programa puru e a sa trevessa si fait sa pròpia cosa.

5. Su programa benit adelantau dònna annu cunforma a is balantzus annuali e pluriennali aprovaus.

SEGUNDU CÀBUDU: SA AUTONOMIA FINANTZIÀRIA

Art.122 Is risorsas po sa gestioni currenti

1. Su Comunu persighit, atruessu s'impreu de sa podestadi impositiva cosa sua e cun s'impreu de is risorsas imboadas de su Stadu e chi pertocant a sa Regioni, sa cumpridura de cunditzionis de autonomia finantziària bera, aconcendi is programas e is atividadis fatas a is mesus a disposidura e circa, atruessu sa ratzionalidadi de is scioberus e de is procedimentus, s'impreu profetosu de custus mesus, asseguendi s'acuilìbriu de su Balantzu.

2. Su Comunu, ativendi su cuncursu de is tzitadinus a is gastus pùblicus localis, ispirat a allegas de ecuidadi e de giustitzia is determinatzionis de cumpetèntzia sua chi pertocant a is ordinamentus e a is tarifas de is impostas, tassas, deretus e currispetivus de is servìtzius, spratzinendi su càrrigu tributàriu de manera de asseguirai sa partecipazioni de dònna tzitadinu cunforma a is poderius cuntributivus efetivus cosa sua.

3. Su Segretàriu e/o su Diretori Generali asseguirant a is ufìtzius tributàrius de su Comunu is dotatzionis de su personali spetzializau e is trastus netzessàrius po apariciai totus is elementus de valutazioni chi serbint po cumpriri sa finalidadi de su comma 2.

Art.123 Is risorsas po is imbistimentus

1. Sa Giunta ativat totus is proceduras previdias de is leis costumadas e spetzialis, statalis e regionalis e comunitàrias, cun sa tarea de agatai totus is risorsas po su funtzionamentu de is programas de imbistimentu de su Comunu chi po sa genia insoru tenint sa tarea de traballai po is benefitzius chi custas leis cuncordant.

2. Is risorsas pigadas atruessu de sa pinnigadura de is benis de s'azienda a disposidura, chi no funt distinadas po lei a atras tareas, funt impreadas po su finanziamentu de su programa de is imbistimentus de su Comunu, sighendi is propridadis cumandadas de custu e totu.

3. Su recursu a su crèditu est fatu, aforas de tareas diferentis previdias de sa lei, po su finanziamentu chi no agatat cerobertura cun is risorsas numenadas in is commas 1 e 2.

4. Su Comunu po su finanziamentu de programas pluriennalis podit impreai su crèditu obligatzionàriu.

SU DE TRES CÀBUDU: SA CHISTIDURA E GESTIONI DE S'ASIENDA

Art.124 Sa gestioni de s'asienda

1. Su Sìndigu subraintendit a su traballu de amparu de s'asienda comunali asseguendi, atruessu unu ufìtziu apòsitu, sa tentura de is imbentàrius de is benis imòbilis o mòbilis e su adelantamentu sighiu cosa insoru. Su Regulamentu cuncordat is maneras po sa tentura de custus imbentàrius e scioberat is tempus aintru de is calis funt postus asuta de averiguadura generali.
2. Su Sìndigu arricit is àutus prevèdius de su regulamentu po asseguirai, po parti de totus is responsàbilis de ufìtzius e servìtzius, su càstiu de su cumandu generali de diligèntzia in s'impreu e in sa chistidura de is benis de s'Enti. Po is benis mòbilis custa responsabilidadi est entregada a arricidoris, scioberaus de su regulamentu.
3. Su Sìndigu arreconnoscit su responsàbili de sa gestioni de is benis imòbilis de s'asienda a disposidura e impreat, po iniziativa sua o apustis de propònnida de su responsàbili, is provedimentus prus profetosus po asseguirai una arrenda manna de is benis numenaus e sa'afilladura de custus in allogu e/o comodau a sugetus chi donint garantzias bonas de afidabilidadi. A su responsàbili de sa gestioni de is benis tocat sa cumpridura de is proceduras po sa arricidura, coativa puru, de is intradas eventualis chi pertocant a custus e totu.
4. Is benis de asienda de su Comunu no podint, de costumàntzia, èssiri entregaus in comodau o impreu a indonu. Is dèrogas, giustificadas de arresonis de interessu pùblicu funt deliberadas de su Cunsillu Comunali apustis de sa propònnida de su Sìndigu.
5. Is benis de asienda a disposidura podint èssiri pinnigaus, apustis de sa deliberatzioni impreada de su Cunsillu Comunali po is imòbilis e de sa Giunta po cussus mòbilis, candu sa arrendabilidadi insoru bessat pagu profetosa a su balori insoru e cussus no bessant de importu artìsticu e stòrigu o de dònna maniera siat netzessàriu scioberaì in cussu caminu po infrentai, cun su godàngiu, a apretus finantziàrius straordinàrius de s'Enti.
6. Sa pinnigadura e sa cuncesioni onerosa de is benis imòbilis acontessit, de costumàntzia, atruessu asta pùblica. Cussa chi pertocat a is benis mòbilis cun maneras scioberas de su regulamentu.

SU DE CUÀTURU CÀBUDU: SA REVISIONI ECONÒMICU-FINANTZIÀRIA

Art.125 Su Cullègiu de si Revisoris de is contus

1. Su Cunsillu Comunali eligit, cun votu impitica a duus cumponentis, su Cullègiu de Revisoris de is ocntus, furmau de tres membrus de is calis duus amostaus apustis de sa propònnida de sa majoria e unu de sa minoria, scioberaus cunforma a cussu chi cumandat s'articulu 234 de su D. Lgs. 267/2000. Is propònnidas chi pertocant a s'eligidura de su Cullègiu no podint èssiri chistionadas e deliberadas de su Cunsillu Comunali si no alliongiadas cun is tìtulus professionalis pedius.
2. Is Revisoris sighint in càrriga tres annus e si podint torrai a eligi po una borta sceti. No si podint pinnigai, a foras chi no cumprant a s'incàrrigu insoru, sighendi is normas

de lei e de su Statutu.

3. No podint èssiri elìgius Revisoris de is contus e si elìgius benint bogaus de èssiri cumponentis de su Cullègiu:

- a) is membrus de is cumitatus regionalis de scrucullu e setzionis imbordigadas;
- b) is Cunsilleris Comunalis, de Circoscritzioni e is Assessoris e is familiaris e cussus de intradura insoru aintru de su de cuàturu gradu;
- c) is amistradoris, dipendentis, Revisoris de is aziendas comunalis e de is sotziedadis a partecipazioni comunali;
- d) is amistradoris, Cunsilleris e dipendentis de Comunas, Provìntzias, Comunitadis Montanas de sa Regioni Sardìnnia;
- e) is Revisoris, chi, aforas de una disposidura differenti de su regulamentu de contabilidadi, si pigant in totu unu nùmeru de incàrrigus prus mannu de is trèminis de lei;
- f) is amistradoris e is dipendentis de s'istitutu de crèditu cuncessionàriu o Tesorerias de su Comunu;
- g) cussus chi funt in is cundizioni prevìdias de s'artìculu 2382 de su Còdixi Tzivili.

4. Est arresoni de decadèssida de sa càrriga de Revisori sa bogadura o sa suspendidura de arrolu de s'Albu de is Revisoris ufizialis de is contus, de is Dotoris Cumercialistas e de is Ragioneris, cumentu puru sa scridura fartada de sa relata de su rendicontu in is trèminis de Lei o sa partecipazioni fartada, chene arresonis bonas, a tres acorradas sighias de su Cullègiu.

5. In acontèssiu de morti, renùntzia o decadèssida de unu Revisori, cussu e totu depit èssiri arremprasau su prus a lestru possìbili e de dònna manera aintru de cuarantaxincu diis. Su Revisori nou aturat in càrriga finsas a s'acabu de su mandau triennali de su Cullègiu.

6. A is membrus de su Cullègiu de is Revisoris est entregada una indennidadi de funtzioni su cali tanti est scioberau de su Cunsillu comunali in su tempus de s'eligidura de su Cullègiu e totu.

7. Su Cullègiu de is Revisoris traballat impari cun su Cunsillu Comunali cunforma a cussu prevìdiu de custu Statutu. Cumprit su càstiu apitzu de sa regularidadi contàbili e finantziària de sa gestioni.

8. Po sa cumpridura de is funtzionis insoru is Revisoris tenit deretu de intrada a is àutus e documentus de s'Enti.

9. Is Revisoris de is contus cumprit a is tareas insorus cun sa diligèntzia de su mandadoroi e torrante sceda de sa beridadi de is atestazioni insoru. Aundi agatint irregularidadis mannas in sa gestioni de s'Enti, ndi scoviant deretu a su Cunsillu Comunali.

10. Su Cullègiu de is Revisoris de is contus cunfrimat sa corrispondèntzia de is rendicontu a is arresultaus de sa gestioni e apariciat sa relata apòsita.

11. Su Cullègiu de is Revisoris de is contus cumprit a is funtzionis entregadas de sa lei e traballat impari cun su Cunsillu Comunali in sa funtzioni sua de scrucullu e de caminu:

- a) sinnalendi a su Cunsillu, in ocasioni de sa presentada de su balanzu de prevididura, is cuntènnius de cussu e totu cunsideraus bonus po unu esàmini particulari;
- b) sinnalendi cosas e acontèssius de sa gestioni econòmicu-finantziàrias de su

- tempus chi potzant strobai a s'arresultau de s'esercitziu;
- c) ponendi asuta de càstiu is valutatzionis insoru apitzu de is arresultaus de su scrucullu econòmicu de sa gestioni e aparicendi castiendi a custos propònnidas eventualis;
 - d) pighendi parti de manera cullegiali, cun funtzionis de relata e consultivas, a is acorradas de su Cunsillu Comunali chi pertocant a s'aprovatzioni de su balantzù e de su rendicontu.

12. Is Revisoris de is contus no pigant parti a is setziadas de sa Giunta Comunali. Podit èssiri pedia sa presèntzia insoru a is setziadas de su Cunsillu o de is Cumissionbis cunsillaris.

SU DE CINCU CÀBUDU: ARRENDUS E CUNTRATUS

Art.126 Protzeduras negotzialis

1. Su Comunu cumprit is arrendus de traballus, is fruniduras de cosas e servitzius, is còmportas e is bèndidas, is cuncàmbius, is locatzionis e is allogus, chi pertocant a s'atividadadi istitutzionali cosa sua, cun su càstiu de is proceduras cumandadas de sa lei, de su Statutu e de su regulamentu po sa cuncordada de is cuntratus.

2. Su Comunu si imbòrdigat me is proceduras previdias de sa normativa de s'Unioni Europea arricia, o de dònna manera vigenti in s'ordinamentu giuridicu.

3. Po sa cumpridura de is cuntratus interbenit, in rapresentàntzia de su Comunu, su Dirigenti cumpetenti po cuss'allega, o atru Dirigenti numenau de su Sìndigu.

SU DE SES CÀBUDU: SCRUCULLUS INTERNUS

Art.127 Tareas de su scrucullu

1. S'Aministratzioni impreat trastus profetosus po:
 - a) assegurai sa legitimidadi, regularidadi e currigidura de su traballu aministrativu (scrucullu de regularidadi aministrativa e contàbili);
 - b) averiguai s'eficatzidadi, s'atùliu e sa economitzidadi de su traballu aministrativu cun sa tarea de otimizai, puru atruessu interbènnidas lestras de currigidura, sa relata intre gastus e arresultaus (scrucullu de gestioni);
 - c) valutai is prestatzionis de su personali cun califica dirigenziali (scrucullu de sa dirigèntzia);
 - d) valutai su profetu de is scioberus fatus in su tempus de cumpridura de is pianus, programmas e atrus trastus de determinatzioni de su caminu polìticu, chistionendi de congruentza intre is arresultaus lòmpius e is tareas apariciadas (valutatzioni e scrucullu stratègicu).

Art.128 Arresultaus de sa gestioni econòmicu-finanziària

1. Is arresultaus de sa gestioni de s'annu finanziàriu funt resùmius e amostaus in su rendicontu de su Comunu apariciau de tres partis diferentis: su contu de su balantzù, su contu de s'azienda e su contu econòmicu. S'articulatzioni e sa classificatzioni de is

intradadas e is fastus depit permiti sa averiguadura de su sentidiu econòmicu de is godàngius contabilizaus.

2. Sa Giunta, cun una relata sprigadora alliongiada a su rendicontu, ampmat is valutatzioni cosa sua apitzu de su profetu de su traballu fatu, castiendi is arresultantzias lòmpias alliongiadas cun is programas e is gastus tentus.

3. Su Cullègiu de is Revisoris de is contus amostat sa currispondèntzia de su rendicontu de is arresultantzias de sa gestioni, scriendi una relata apòsita chi acumpàngiat sa propònnida de deliberatzioni cunsillari de su rendicontu e aundi su Cullègiu amostat is rilevamentus e is propònnidas chi bandant bia a cumpriri unu atùliu, una produtivadi e economitizidadi mellus de sa gestioni.

4. Su rendicontu est deliberau de su Cunsillu Comunali aintru de su 30 de làmpadas de s'annu apustis, in setziada pùblica, cun su votu de sa majoria de is Cunsilleris presentis. In is acorradas de segunda tzerriada su rendicontu podit èssiri postu a votai sceti si siat presenti, in su tempus de votai, a su mancu sa mitadi de is Cunsilleris in càrriga.

5. Dònnia annu is arresultaus de gestioni ant a depi èssiri publicaus a su mancu in unu cuotidianu e unu periòdicu locali.

Art.129 Nùcleu de valutazioni e scrucullu stratègicu

1. Est apariciu su nùcleu de valutazioni e scrucullu stratègicu po averigui sa congruèntzia intre is tareas scioberadas de is pianus e programas cumandaus de is òrganus comunalis de caminu polìticu e is arresultaus lòmpius.

2. Est apariciu de:

- a) unu membru internu in sa bisura de su Segretàriu Generali o Diretori Generali si est stètiu numenau;
- b) duus membrus de aforas elìgius de su Cunsillu Comunali, espertus apitzu de su deretu amministrativu e organizazioni aziendali.

3. Su nùcleu de valutazioni e scrucullu stratègicu narat de manera resguardada a is òrganus comunalis de indiritzu polìticu; de dònnia setziada de su nùcleu est apariciu unu verbalu apòsitu. Custu est imbiu in còpia a su s'indigu, a sa Giunta e a is Capigruppu Cunsillaris.

Art.130 Nùcleu po su scrucullu de gestioni e sa valutazioni de is Dirigentis

1. Benit apariciu su nùcleu po su scrucullu de gestioni e sa valutazioni de is Dirigentis po averigui s'atùliu, sa eficatzidadi e sa economitizidadi de su traballu amministrativu e castiai is prestatzioni de su personalicun calìficas dirigentzialis. Su procedimentu po sa valutazioni est ispirau a is allegas de sa connoscèntzia dereta de sa atividadi de su carcalu po parti de s'òrganu proponnidoru, de s'averiguadura de sa valutazioni po parti de s'òrganu imbordigau, de sa partecipazioni a su procedimentu de cussu valutau.

2. Est apariciu po parti de su Segretàriu Generali o Diretori Generali si est stètiu numenau e de duus membrus de aforas, chi portant is requisitus numenaus in s'art. 129, comma 2, de is calis unu elìgiu de su S'indigu e s'atru de sa Cunferèntzia de is Dirigentis.

3. De dònna setziada de su nùcleu po su scrucullu de gestioni e sa valutazioni de is Dirigentis est scritu unu verbali apòsitu de imbiai in còpia a is Dirigentis e a su Segretàriu Generali o Diretori Generali.

Art.131 Scrucullu de regularitati amministrativa e contàbili

1. Is scrucullus de regularitati amministrativa e contàbili funt afillaus a su Cullègiu de is Revisoris, a su Servìtziu de Ragioneria e a is Servìtzius Ispetivus de sa Lei 662/96.

Art.132 Dotazioni orgànica de is nùcleus e indennidadi

1. A is nùcleus est entregau unu funtzionàriu cun funtzioni de segretàriu verbalizatori.
2. Sa dotazioni orgànica de su personali netzessàriu a sa atividadi de is duus nùcleus est cumandada in su regulamentu apitzu de s'ordinamentu de is ufìtzius e de is servìtzius.
3. Po is componentis de aforas de is nùcleus est prevìdiu unu getoni de presèntzia onnicumprensivu no prus mannu de 1/20 de sa indennidadi de su Sìndigu. Est prevìdiu, in prus, in s'acontèssiu chisiant bividoris aforas de su cabulogu de su Comune, s'arrembursu de is gastus tentus diaderus po pigai parti a dònna setziada.

Art.133 Sistemas informativus po is scrucullus

1. Is sistemas automatizaus e is proceduras manualis de importu, bia a su sistema de scrucullu, funtustus chi s'inghiant:
 - a) sistemas e proceduras chi pertocant a sa rendicontazioni contàbili de sa amministratzioni a sola;
 - b) sistemas e proceduras chi pertocant a sa gestioni de su personali (de genia econòmica, finantiària e de atividadi, presèntzias, ausèntzias, atribuzioni a centru de disponibilitadi);
 - c) sistemas e proceduras chi pertocant a s'abisòngiu e a su dimensionamentu de su personali;
 - d) sistemas e proceduras chi pertocant a s'agatadura de is atividadis fatas po sa cumpridura de is tareas istituzionalis (spratzinadura prodùssius/servìtzius, adelantamentu proceduras amministrativas) e de is consequèntzias imbordigadas;
 - e) sistemas e proceduras chi pertocant a su scrucullu de is gastus de funtzionamentu (personali, benis e servìtzius) de s'Amministratzioni;
 - f) sistemas e proceduras de contabilitadi analìtica.

SU DE SETI CÀBUDU: TESORERIA E CUNCESSIONÀRIU DE SU CUBERAMENTU

Art.134 Tesoreria e cuberamentu de is intradas

1. Su servìtziu de Tesoreria est afillau de sa Giunta a unu istitutu de crèditu chi tènghiati una sedi operativa in su territòriu comunali.
2. Sa entrega, rennoàbili, est arregulada de una cumbentzioni apòsita e tenit una

sighidura mìnima de tres annus e màssima de cinqu annus.

3. Su Tesorieri fait su cuberamentu de is intradas chi pertocanta su Comunu e cumprit su pagamentu de is gastus cuncordaus atruessu de mandaus de pagamentu in is tèrminis de is stantziamentus de balantzù e de is fundus de càscia a disposidura o chi podint èssiri antetizpau sighendi is disposiduras cumandadas de sa lei.

4. Po su cuberamentu de is intradas tributàrias su Comunu providit imperendi su Cuncessionàriu de su cuberamentu. Po is intradas de s'asienda e cussas alliongiadas, sa Giunta scioberat, sighendi s'interessamentu de s'Enti, sa manera de cuberamentu in su s'itiu de cussas permitias de is leis vigentis.

5. Su regulamentu de contabilidadi scioberat is maneras chi pertocant a su servìtziu de tesoreria e a is servìtzius de s'Enti chi ocasionant su manìgiu de dinai.

**SU DE NOI TÌTULU:
CULLABORATZIONI E RELATAS
CUN ATRUS ENTIS**

SU DE NOI TÌTULU: CULLABORATZIONI E RELATAS CUN ATRUS ENTIS

Art.135 Su Stadu

1. Su Comunu gestit is servìtzios de cumpetèntzia statali, entregaus de sa lei, in is maneras prus profetas a assegurai su funtzionamentu mellus a profetu de is tzitadinus. Su Sìndigu cumprit is funtzionis imbordigadas, cumenti Ufizziali de Guvernu.
2. Su Comunu traballat po cumpriri is tareas de apoderamentu po sa cumpridura, in su territòriu cosa sua, de funtzionis de interessu generali po parti de su Stadu, in su sìtiu de is tareas scioberadas de is leis e is cunditzionis previdias de custas e totu.
3. Su Comunu cumprit is funtzionis delegadas de su Stadu, chi assegurat sa cumpridura de is dèpiris imbordigaus.

Art.136 Sa Regioni

1. Su Comunu cumprit is funtzionis amministrativas entregadas a custu de is leis regionalis, me is allegas chi, in relata a is carateristicas de sa popolazioni e de su territòriu, bessint cunformas a is interessus de sa Comunità locali.
2. Su Comunu agiudat, atruessu de su coordinamentu de sa Provìntzia, a sa programazioni econòmica, territoriali e ambientali de sa Regioni.
3. Su Comunu, in su traballu de programazioni de cumpetèntzia sua, cumprit ingunis a is indirizus generalis e a is proceduras cumandadas de is leis regionalis.

Art.137 Sa Provìntzia

1. Su Comunu cumprit, atruessu de sa provìntzia, is funtzionis proponnidoras apitzu de sa programazioni de sa Regioni. Pigat parti a su coordinamentu, promòviu de sa Provìntzia, de sa atividadi cosa sua de programazioni cun cussa de is atrus Comunas, in su sìtiu provintziali.
2. Sa cumpatibilidadi de is trastus de apariciadura territoriali apariciaus de su Comunu cun is previduras de su pianu territoriali de coordinamentu, est averiguada de sa Provìntzia chi cumprit, in custa allega, totus is funtzionis entregadas a custa de sa Regioni e totu.
3. Su Comunu traballat impari cun sa Provìntzia po sa cumpridura, sighendi is programas, de atividadis e de obras de interessu provintziali mannu, siat me is setoris econòmicu, produssidori, cumerciali e turisticu, e siat in cussus sotziali, culturali e sportivu.

Art.138 Sa Comunitadi Montana

1. su Cunsillu Comunali podit delegai e/o pinnigai a sa Comunitadi Montana sa cumpridura de funtzionis de competèntzia comunali, entregghendi e/o pinnighendi a costa e totu is risorsas netzessàrias. Sa deliberatzioni de dèlega est impreada in setziada pùblica, cun su votu favoràbili de sa majoria prena de is Cunsilleris imbordigaus.

2. Su Cunsillu comunali cumprit funtzionis de indiritzu e de scrucullu po cussu chi pertocat a sa cumpridura de is competèntzias delegadas a sa Comunitadi Montana.

**SU DE DEXI TÌTULU
NORMAS TRANSIDORAS E FINALIS**

SU DE DEXI TÌTULU: NORMAS TRANSIDORAS E FINALIS

Art.139 Revisioni de su Statutu

1. Is mudàntzias e s'abrogatzioni de su Statutu funt deliberadas de su Cunsillu Comunali cun sa procedura cumandada de su comma 4 de s'art. 6 de su D. Lgs. 267/2000.

2. Is propònnidas de mudàntzia o de abrogatzioni de su Statutu funt postas a suta de su parri de is Cunsillus Circoscrittionalis e de is atrus organismus de partecipazioni popolari, chi depit èssiri pediu a su mancu binti diis ainnantis de sa acorrada de su Cunsillu Comunali. Aintru de cussu trèmini e totu funt imbiadas in còpia a is Cunsilleris Comunalis, e chistias aintru de sa Segreteria Comunali, donendi avisus pùblicos de custa entrega in is maneras previdias de su Regulamentu.

3. Sa propònnida de dliberatzioni de abrogatzioni intrea de su Statutu depit èssiri presentada a su Cunsillu Comunali impari cun cussa de deliberatzioni de su Statutu nou.

4. S'arricidura eventuali de is duas deliberatzionis depit èssiri consensuali, poita s'abrogatzioni intea de su Statutu si pigat profetu cun sa aprovatzioni de su testu statutàriu nou.

Art.140 Arricidura de is regulamentus

1. Su regulamentu de su Cunsillu Comuanli est deliberau aintru de ses mesis de s'intrada in vigori de custu Statutu.

2. Is atrus regulamentus arregordaus in su Statutu, e po sa arricidura sua no siat pensau unu trèmini de lei o no siat previdiu unu trèmini de su Statutu e totu, funt deliberaus aintru de unu annu de sa intrada in vigori de custu Statutu e totu.

Art.141 Disciplina transidora

1. Finsas a sa intrada in vigori de is Regulamentus numenaus in s'art. 140 si s'ghint a impreai is normas regulamentaris in vigori, bastit chi no siat a sa trevessa totu respetu a is disposiduras de sa Lei o de su Statutu e totu.

Art.142 Intrada in vigori

1. Custu Statutu est publicau in su Bulletinu Ufitziali de sa Regioni e est apicau in s'Albu Pretòriu de su Comune po trinta diis s'ghias.

2. Su Sìndigu imbiat su Statutu, cun totus is certificatzionis de esecutividadadi e de publicatzioni alliongiadas, a su Ministeru de s'Internu, poita siat fichiu aintru de sa arregòllida ufitziali de is statutus.

3. Custu Statutu intrat in vigori passadas trinta diis de sa apicadura sua in s'Albu Pretòriu de su Comunu.
4. Su Segretàriu Generali, cun deccaratzioni apòsita alliongiada a su Statutu, ndi cunfrimat sa intrada in vigori.
5. Su Cunsillu Comunali promovit is initziativas prus profetosas, cumprèndias puru is publicatzionis de genia spratzinadora, po assegurai a is tzitadinus sa connoscèntzia de su Statutu.